

MESYUARAT KEDUA, PENGGAL KETIGA
PARLIMEN KEEMPAT BELAS
2020

HARI ISNIN : 3 OGOS 2020

JAWAPAN-JAWAPAN BAGI PERTANYAAN-PERTANYAAN JAWAB

LISAN YANG TIDAK DIJAWAB DI DALAM DEWAN

(SOALAN NO. 4, 14 HINGGA NO. 60)

[SOALAN NO 4 DIJAWAB BERSEKALI DENGAN SOALAN NO 17]

JAWAB BERSEKALI NO. SOALAN : 4 DAN 7

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

DARIPADA : DATUK DR. HASAN BIN BAHROM [TAMPIN]

TARIKH : 3 OGOS 2020 (ISNIN)

SOALAN NO. 4

Minta **MENTERI PENGANGKUTAN** menyatakan berhubungkait dengan, bilakah Kementerian hendak membentangkan rang undang-undang berhubungkait dengan kes pemandu memandu dalam keadaan mabuk sehingga menyebabkan kematian, apakah Kerajaan akan mengenakan hukuman yang lebih berat kepada pesalahpesalah tersebut dan bagaimana Kerajaan hendak memastikan pemandu tidak memandu dalam keadaan mabuk.

DARIPADA : TUAN ABDUL LATIFF BIN ABDUL RAHMAN [KUALA KRAI]

TARIKH : 3 OGOS 2020 (ISNIN)

SOALAN NO. 17

Minta **MENTERI PENGANGKUTAN** menyatakan adakah Kementerian bercadang untuk menguatkuasakan hukuman mati dan denda terhadap pemandu mabuk yang menyebabkan kematian serta pesalah juga hendaklah membayar 'bayaran khas' kepada keluarga mangsa.

JAWAB BERSEKALI NO. SOALAN : 4 DAN 7

**DARIPADA : DATUK SERI DR. MUJAHID BIN YUSOF
RAWA [PARIT BUNTAR]**

TARIKH : 6 OGOS 2020 (KHAMIS)

SOALAN NO. 26

Minta **MENTERI PENGANGKUTAN** menyatakan sama ada Kementerian bersedia meneruskan inisiatif untuk meminda undang-undang berkaitan pemandu mabuk sebagaimana yang telah diluluskan oleh Kabinet pada akhir tahun 2019.

**DARIPADA : DATO' SERI HAJI ABDUL HADI BIN
AWANG [MARANG]**

TARIKH : 6 OGOS 2020 (KHAMIS)

SOALAN NO. 49

Minta **MENTERI PENGANGKUTAN** menyatakan apakah cadangan pindaan hukuman terhadap pemandu mabuk mengikut Akta Pengangkutan Jalan 1987 (Akta 333) dan pelan secara komprehensif dalam mengawal penjualan arak secara terbuka.

**DARIPADA : TUAN PRABAKARAN A/L M
PARAMESWARAN [BATU]**

TARIKH : 12 OGOS 2020 (RABU)

SOALAN NO. 36

Minta **MENTERI PENGANGKUTAN** menyatakan apakah Kementerian akan mengkaji semula akta kesalahan berkaitan kemalangan maut disebabkan oleh pemandu mabuk.

JAWAB BERSEKALI NO. SOALAN : 4 DAN 7

DARIPADA : TUAN RAMLI BIN DATO' MOHD NOR
[CAMERON HIGHLANDS]

TARIKH : 18 OGOS 2020 (SELASA)

SOALAN NO. 6

Minta **MENTERI PENGANGKUTAN** menyatakan untuk menilai dan meminda Undang-undang di dalam Seksyen 44 dan Seksyen 45A (1) Akta Pengangkutan Jalan 1987 iaitu hukuman bagi kesalahan memandu kenderaan dalam keadaan mabuk, pengaruh dadah serta memandu secara bahaya yang sedia ada di pinda dengan penambahan penjara 'MANDATORI'. Hal ini dilihat semakin membimbangkan kerana kes tersebut dilihat kerap kali berlaku dan banyak meragut nyawa pemandu lain.

DARIPADA : TUAN SYED IBRAHIM BIN SYED NOH
[LEDANG]

TARIKH : 26 OGOS 2020 (RABU)

SOALAN NO. 8

Minta **MENTERI PENGANGKUTAN** menyatakan langkah-langkah Kementerian bagi menangani kes kemalangan jalan raya melibatkan pemandu bawah pengaruh alkohol dan dadah atau memandu secara berbahaya selain daripada meminda undang-undang.

JAWAB BERSEKALI NO. SOALAN : 4 DAN 7

DARIPADA : DATO' SRI HASAN BIN ARIFIN [ROMPIN]

TARIKH : 26 OGOS 2020 (RABU)

SOALAN NO. 11

Minta **MENTERI PENGANGKUTAN** menyatakan statistik kemalangan yang berpunca dari pemandu yang memandu di bawah pengaruh alkohol dari tempoh Januari 2019 sehingga Mac 2020 serta apakah Kementerian bercadang untuk mendesak penggubalan undang-undang bagi meningkatkan hukuman bagi kesalahan tersebut.

**DARIPADA : DATO' MOHD. NIZAR BIN HAJI ZAKARIA
[PARIT]**

TARIKH : 27 OGOS 2020 (KHAMIS)

SOALAN NO. 1

Minta **MENTERI PENGANGKUTAN** menyatakan :-

(a) adakah Kementerian akan mengikuti piawaian yang telah ditetapkan oleh Pertubuhan Kesihatan Sedunia (WHO) iaitu 50 miligram (mg) kandungan alkohol dalam 100 mililiter (ml) darah bagi mengesan pemandu mabuk; dan

(b) adakah terdapat sebarang halangan untuk mengikuti piawaian tersebut.

JAWAB BERSEKALI NO. SOALAN : 4 DAN 7

**DARIPADA : TAN SRI NOH BIN HAJI OMAR
[TANJONG KARANG]**

TARIKH : 27 OGOS 2020 (KHAMIS)

SOALAN NO. 23

Minta **MENTERI PENGANGKUTAN** menyatakan berapa banyak kes kemalangan jalan raya yang melibatkan pemandu mabuk dari tahun 2015 hingga ke tahun 2019 dan apakah langkah-langkah segera yang akan diambil.

**DARIPADA : PUAN KASTHURIRAANI A/P PATTO
[BATU KAWAN]**

TARIKH : 27 OGOS 2020 (KHAMIS)

SOALAN NO. 35

Minta **MENTERI PENGANGKUTAN** menyatakan selain daripada mengenakan hukuman dan denda yang lebih berat bagi kes memandu dalam keadaan mabuk sehingga menyebabkan cedera atau maut :-

(a) apakah rancangan Kerajaan dalam usaha pencegahan memandu dalam keadaan mabuk ; dan

(b) senaraikan usaha proaktif Kerajaan untuk mengurangkan kadar kemalangan jalan raya dari segi penguatkuasaan, keadaan jalan raya, sikap pemandu, dan faktor-faktor yang lain.

JAWAPAN

Yang di-Pertua,

Saya memohon izin untuk menjawab soalan yang dibangkitkan oleh beberapa Ahli Yang Berhormat iaitu YB Tampin dan YB Kuala Krai pada hari ini, YB Parit Buntar dan YB Marang pada 6 Ogos 2020, YB Batu pada 12 Ogos 2020, YB Cameron Highlands pada 18 Ogos 2020, YB Ledang dan YB Rompin pada 26 Ogos 2020, serta YB Parit, YB Tanjong Karang dan YB Batu Kawan pada 27 Ogos 2020, secara bersekali kerana isu yang dibangkitkan adalah berkisar topik yang sama iaitu berkaitan kesalahan memandu di bawah pengaruh alkohol atau pemandu mabuk.

Untuk makluman Yang Berhormat, isu kemalangan maut yang disebabkan oleh pemandu yang memandu di bawah pengaruh alkohol adalah merupakan satu perkara yang amat dipandang serius oleh Kerajaan khususnya Kementerian Pengangkutan. Perkara ini jika tidak dibendung dengan serius, akan membawa kesan yang amat negatif kepada orang ramai dan pengguna jalan raya lain yang tidak bersalah.

Dalam usaha menangani isu ini serta aspek keselamatan jalan raya secara amnya, pendekatan dan strategi yang holistik adalah diperlukan bagi memastikan usaha ini berjaya dan mencapai objektifnya. Dalam hal ini, skop tanggungjawab Kementerian Pengangkutan adalah tertumpu kepada aktiviti advokasi, program pendidikan, penetapan peraturan dan penguatkuasaan.

Justeru itu, sebagai salah satu strategi utama dalam usaha mencegah dan menjadi *deterrence* kepada orang ramai daripada memandu di bawah pengaruh alkohol atau dadah, Akta Pengangkutan Jalan 1987 [Akta 333] akan dipinda bagi meningkatkan hukuman-hukuman berkaitan kesalahan memandu dengan tidak mematuhi peraturan jalan raya termasuk memandu dalam keadaan mabuk. Bacaan pertama Rang Undang-Undang ini telah pun dilaksanakan pada sesi parlimen pada 27 Julai 2020 yang lalu. Bacaan kali kedua dan ketiga turut dijadualkan dalam sesi parlimen kali ini.

JAWAB BERSEKALI NO. SOALAN : 4 DAN 7

Secara spesifik, pindaan seksyen 41 hingga seksyen 45 merupakan komitmen kerajaan untuk memastikan tindakan tegas bagi kesalahan pemanduan di bawah pengaruh alkohol, dadah atau memandu secara melulu, termasuk merempit.

Ahli Yang Berhormat, Kementerian Pengangkutan telah melaksanakan soal selidik atas talian mengenai perkara ini mulai 21 Mei 2020 sehingga 4 Jun 2020 yang lepas. Berdasarkan kepada dapatan responden seramai 345 ribu orang.

Hampir 97% responden memberikan maklum balas yang positif dan bersetuju bahawa kuantum hukuman sedia ada tidak memadai. Sebagai contoh, seramai 324,489 iaitu 94% responden bersetuju agar kadar hukuman penjara, denda dan tempoh hilang kelayakan lesen memandu ditingkatkan ke atas pemandu yang disabitkan kesalahan dalam keadaan pemanduan mabuk.

Selain daripada pindaan ke atas hukuman sedia ada, saya juga telah mengarahkan Kementerian Pengangkutan dan agensi-agensi utama termasuk Jabatan Pengangkutan Jalan (JPJ) dan MIROS untuk menggiatkan lagi aktiviti advokasi dan program pendidikan keselamatan jalan raya. Dalam pelaksanaan program-program sebegini, saya menyeru semua pihak yang berkepentingan termasuk NGO, pengusaha premis minuman/makanan, pengendali perkhidmatan pengangkutan awam dan lain-lain untuk bekerjasama dengan Kementerian bagi menjayakan usaha ini ke arah menjamin kesejahteraan dan keselamatan rakyat Malaysia. Saya percaya pelbagai program, kemudahan dan inisiatif boleh diadakan dengan jayanya dengan sokongan dan penglibatan semua pihak.

Kementerian Pengangkutan berharap agar Rang Undang-Undang Pindaan yang akan dibentangkan di dalam dewan ini akan mendapat sokongan daripada semua ahli-ahli Yang Berhormat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

**DARIPADA : Y.B. DATUK SERI SAIFUDDIN NASUTION
BIN ISMAIL [KULIM]**

TARIKH : 3 OGOS 2020 (ISNIN)

SOALAN

DATUK SERI SAIFUDDIN NASUTION BIN ISMAIL [KULIM-BANDAR BAHARU] minta **MENTERI KEWANGAN** menyatakan kesan pakej pemulihan dan rangsangan ekonomi akibat COVID-19 terhadapimbangan dagangan, eksport negara, defisit fiskal, inflasi dan kehilangan pekerjaan.

JAWAPAN

Tuan Yang di-Pertua,

1. Pandemik COVID-19 dan kawalan pergerakan telah memberi kesan kepada aktiviti ekonomi di seluruh dunia. Berdasarkan unjuran Tabung Kewangan Antarabangsa (IMF), pertumbuhan ekonomi dunia dijangka menguncup 4.9% dan perdagangan global dianggarkan merosot 11.9% pada tahun 2020 akibat pandemik ini.

2. Sebagai sebuah ekonomi terbuka, prestasi sektor luaran Malaysia turut terjejas sejajar dengan prestasi ekonomi dan perdagangan global yang semakin perlahan dan ketidakpastian harga komoditi. Bagi tempoh enam bulan pertama 2020, lebih dagangan negara berkurang sebanyak 4.1% kepada RM64.6 bilion, berbanding tempoh yang sama pada 2019. Eksport telah menguncup 6.8% kepada RM449 bilion dan import merosot 7.2% kepada RM384.4 bilion. Perdagangan dua hala yang lebih rendah telah direkodkan bersama rakan dagang utama,

terutamanya dengan Singapura, Jepun, Taiwan, Negara Thai dan Hong Kong.

3. Indeks Harga Pengguna (IHP) pula telah mencatatkan penurunan 0.8% bagi tempoh enam bulan pertama 2020 terutamanya disebabkan oleh harga minyak mentah global yang rendah. Manakala pelaksanaan pakej rangsangan dijangka memberi kesan minimum kepada IHP. Menurut Bank Negara Malaysia (BNM), IHP diunjur berkembang di antara -1.5% hingga 0.5% bagi keseluruhan tahun 2020.

4. Pada Mei 2020, kadar pengangguran telah melonjak kepada 5.3 peratus, dengan bilangan penganggur meningkat kepada 826,100 orang berbanding 3.3 peratus pada hujung 2019. Peningkatan ini disebabkan sebahagian besarnya oleh penutupan operasi kebanyakan perniagaan semasa tempoh Perintah Kawalan Pergerakan (PKP). Walau bagaimanapun, Kerajaan telah memperkenalkan beberapa inisiatif penstabilan pekerjaan menerusi pakej rangsangan dan pemulihan ekonomi seperti program subsidi upah, pengekalan pekerjaan dan insentif pengambilan pekerja yang bertujuan untuk meminimumkan impak COVID-19 ke atas pasaran buruh dan mengembalikan ekonomi ke tahap guna tenaga penuh.

5. Pakej-pakej Rangsangan Ekonomi PRIHATIN dan PENJANA yang keseluruhannya bernilai RM295 bilion telah memberikan impak segera kepada golongan-golongan yang disasarkan. Sebagai contohnya, sehingga 24 Julai 2020, sebanyak RM62.8 bilion nilai moratorium pembayaran balik pinjaman telah dimanfaat oleh peminjam individu dan perniagaan sekaligus meringankan beban kewangan yang ditanggung. Selain itu, seramai 10.6 juta penerima dikalangan B40 dan M40 telah menerima Bantuan Prihatin Nasional atau BPN, melibatkan belanja sebanyak RM11.14. PRIHATIN dan PENJANA juga membela golongan pekerja di mana sebanyak RM8.01 bilion subsidi di bawah Program Subsidi Upah telah dibayar kepada 319 ribu majikan untuk mengekalkan sebanyak 2.53 juta pekerja.

6. Bagi melonjakkan semula perniagaan, sebanyak RM8.9 bilion pinjaman di bawah Kemudahan Bantuan Khas atau Special Relief Fund (SRF) telah diluluskan oleh bank-bank tempatan dan disetujui terima

oleh lebih kurang 20 ribu PKS. Sebagai tambahan terutama kepada PKS mikro, sebanyak RM1.63 bilion telah dibayar kepada 545,000 PKS mikro di bawah inisiatif Geran Khas Prihatin yang merupakan bayaran tunai secara one-off bernilai RM3,000. Manakala, sebanyak RM459 juta pinjaman mudah PKS mikro melalui TEKUN dan Bank Simpanan Nasional telah disalurkan kepada seramai 32.2 ribu usahawan.

7. Kerajaan juga tidak lupa kepada golongan-golongan mudah terjejas seperti OKU, Orang Asal dan Ibu tunggal berpendapatan rendah, selain pemandu teksi, pemandu pelancong, pemandu bas sekolah dan penarik beca. Bagi golongan ini, Kerajaan telah menyediakan bantuan tunai secara one-off yang dijangka memberikan kelapangan kewangan kepada mereka.

8. Inisiatif Kerajaan dalam pakej rangsangan dan pemulihan ekonomi telah melibatkan suntikan langsung fiskal berjumlah RM45 bilion. Setelah mengambil kira pengurangan hasil berikutan unjuran Keluaran Dalam Negeri Kasar (KDNK) yang lebih rendah, kejatuhan harga minyak mentah dunia serta pertambahan perbelanjaan bagi melaksanakan pakej rangsangan dan pemulihan ekonomi, defisit fiskal pada 2020 dijangka meningkat sekitar 5.8% hingga 6.0% daripada KDNK. Namun begitu, pakej PRIHATIN dan PENJANA keseluruhannya juga dijangka menyumbang lebih 3% kepada pertumbuhan KDNK, sekaligus mengurangkan penguncupan yang dihadapi ekoran kesan COVID-19.

9. Pada tahun 2021, pertumbuhan ekonomi Malaysia dijangka kembali pulih dan berkembang sejajar dengan unjuran pertumbuhan ekonomi dunia dan perdagangan global yang lebih baik, masing-masing pada 5.4% dan 8%. Dengan pemulihan ekonomi dan perdagangan dunia beserta pemulihan ekonomi domestik ini, prestasi ekonomi berkenaan dijangka akan menunjukkan penambahbaikan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DATO' HASBULLAH BIN OSMAN [GERIK]

TARIKH : 03 OGOS 2020 (ISNIN)

SOALAN

Minta **MENTERI PENDIDIKAN** menyatakan apakah langkah-langkah yang diambil oleh Kementerian bagi menyesuaikan jadual persekolahan supaya sesi persekolahan murid boleh berjalan lancar dan apakah usaha yang dilaksanakan bagi menangani masalah keciciran waktu belajar akibat wabak COVID-19.

JAWAPAN

Tuan Yang di-Pertua,

Kementerian Pendidikan Malaysia (KPM) telahewartakan pindaan Takwim Penggal dan Cuti Persekolahan Tahun 2020 pada 23 Jun 2020. Pindaan ini adalah bagi membantu pihak sekolah membuat perancangan pengajaran dan pembelajaran (PdP) dengan teratur. Pindaan ini turut mengambil kira tempoh penutupan sekolah semasa Perintah Kawalan Pergerakan (PKP) dan juga pembukaan semula sekolah secara berperingkat bermula 24 Jun 2020.

Oleh hal demikian, KPM telah melaksanakan penjajaran kurikulum yang meliputi aspek kandungan, pedagogi serta pentaksiran berdasarkan tempoh hari persekolahan dan waktu mata pelajaran dengan memberi fokus kepada hasil pembelajaran yang dihasratkan (*intended learning outcomes*).

Sehubungan itu, pihak sekolah telah menyediakan jadual waktu yang merujuk kepada penjajaran jam minimum kurikulum bersesuaian berdasarkan bilangan murid, guru dan kelas. Bagi sekolah yang melaksanakan model penggiliran, jadual waktu persekolahan dilaksanakan secara fleksibel berdasarkan penjajaran kurikulum yang bersifat *hybrid* iaitu menggabungkan pembelajaran secara bersemuka dan *Home-Based Learning* (HBL). Justeru, waktu PdP dapat dihabiskan mengikut takwim persekolahan yang telah dipinda.

Untuk makluman Ahli Yang Berhormat, KPM komited untuk memastikan semua murid tidak ketinggalan dan dapat mengikuti pembelajaran secara berterusan dalam keadaan selamat sepanjang tempoh PKP. KPM berusaha menyediakan akses pembelajaran kepada murid melalui kaedah *Home-based Learning* mengikut kesesuaian guru dan murid.

Kaedah *Home-based Learning* ini dilaksanakan melalui pelantar pembelajaran digital iaitu MOE-DL, yang kemudiannya dikenali sebagai Digital Education Learning Initiative Malaysia (DELIMa). Pelantar ini boleh diakses oleh guru dan murid. Selain itu, mereka juga boleh menggunakan pelantar EduwebTV, CikgooTube dan Kelas Digital untuk tujuan pengajaran dan pembelajaran (PdP).

KPM sentiasa berusaha untuk memastikan semua murid mendapat akses pembelajaran secara seragam, termasuk juga murid di kawasan luar bandar dan pedalaman. Bagi membantu kumpulan murid yang tidak mempunyai akses kepada talian internet dan alat peranti yang sesuai untuk pembelajaran secara dalam talian, *Home-based Learning* turut dilaksanakan melalui siaran TV Pendidikan. Siaran dilaksanakan melalui saluran TV Okey dan saluran Tutor TV Astro di saluran 601 dan 603.

Selain itu, bagi murid yang tinggal di kawasan luar bandar dan pedalaman khususnya, guru melaksanakan PdP melalui serahan bahan pembelajaran kepada murid. Serahan bahan ini dibuat melalui pelbagai kaedah seperti perkhidmatan pos, bantuan penghantaran oleh Persatuan Ibu Bapa Guru (PIBG) dan kaunter pandu lalu di sekolah.

Segala usaha yang dilaksanakan ini jelas menunjukkan bahawa pihak sekolah serta guru begitu komited dan telah berusaha bersungguh-sungguh dalam melaksanakan tanggungjawab untuk memastikan murid tidak ketinggalan atau tercicir dalam mengikuti pembelajaran yang sewajarnya. KPM ingin merakamkan penghargaan kepada semua guru atas segala usaha yang telah dilaksanakan bagi memastikan pengajaran dan pembelajaran diteruskan walaupun dalam keadaan yang mencabar. Selain itu, KPM juga turut menghargai peranan ibu bapa dalam memastikan pengajaran dan pembelajaran di rumah berjalan dengan baik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DR. ONG KIAN MING [BANGI]

TARIKH : 03 OGOS 2020 (ISNIN)

SOALAN

Minta **MENTERI PENGAJIAN TINGGI** menyatakan sama ada Kerajaan PN akan merancang untuk memperkenalkan pembayaran berdasarkan pendapatan (*income contingent repayments*) untuk pinjaman PTPTN setelah berakhirnya moratorium pembayaran pinjaman pada bulan September 2020. Apakah kos kewangan kepada Kerajaan akibat moratorium pembayaran pinjaman PTPTN selama 6 bulan ini.

JAWAPAN

Tuan Yang di-Pertua,

Mengambil kira situasi ekonomi serta kedudukan kewangan semasa, Kerajaan berpandangan bahawa pelaksanaan kaedah bayaran balik berdasarkan pendapatan dengan izin *Income Contingent Repayment* belum sesuai untuk dilaksanakan dengan mengambil kira jumlah bayaran balik berbanding jumlah pinjaman yang masih belum berbayar atau dengan izin, *Non-Performance Loan* (NPL). Potongan Gaji Berjadual (PGB) mengikut kadar ansuran bulanan sedia ada dikenal pasti sebagai kaedah lebih sesuai untuk dilaksanakan bagi memastikan proses kutipan bayaran balik PTPTN yang lebih mudah dan efisien. Walau bagaimanapun, kerajaan akan sentiasa mengenal pasti pendekatan terbaik bagi bayaran balik pinjaman yang tidak membebankan peminjam dan dalam masa yang sama kepentingan PTPTN terpelihara.

Selain itu, atas keprihatinan kerajaan bagi membantu meringankan bebanan bayaran balik peminjam, beberapa inisiatif telah diperkenalkan antaranya:

- a. Penganjuran '*Virtual Mini Job Hunt for PTPTN Borrowers*' secara dalam talian dengan kerjasama PERKESO bagi membantu peminjam mendapatkan peluang pekerjaan, seterusnya berupaya membuat bayaran balik pinjaman mereka;
- b. Pelaksanaan penangguhan bayaran balik pinjaman selama enam (6) bulan mulai April hingga September 2020 akibat penularan wabak COVID-19;
- c. Membantu mengurangkan bebanan atau komitmen bayaran balik pinjaman dengan sentiasa terbuka untuk membuat rundingan bagi:
 - i. menstrukturkan semula bayaran balik pinjaman sehingga umur 60 tahun; dan
 - ii. menangguhkan bayaran balik pinjaman sehingga maksimum 24 bulan.

Akibat moratorium selama enam (6) bulan, jumlah anggaran kutipan yang ditangguhkan oleh kerajaan adalah sebanyak RM750 juta. Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN MARIA CHIN BINTI ABDULLAH
[PETALING JAYA]**

TARIKH : 03 OGOS 2020 (ISNIN)

SOALAN

Puan Maria Chin binti Abdullah [Petaling Jaya] minta **MENTERI PEMBANGUNAN WANITA, KELUARGA DAN MASYARAKAT** menyatakan untuk menjelaskan prinsip-prinsip asas yang diperjuangkan oleh Kementerian dalam merangka perundangan menentang diskriminasi gender dan bagaimanakah kerangka perundangan baru ini boleh menjadi lebih berkesan berbanding dengan proses mahkamah.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) tetap komited melaksanakan inisiatif bagi menghapuskan diskriminasi berasaskan gender selaras dengan peruntukan berkaitan hak kesamarataan di bawah Perkara 8 Perlembagaan Persekutuan dan peruntukan-peruntukan yang termaktub di dalam Konvensyen Penghapusan Segala Bentuk Diskriminasi Terhadap Wanita (CEDAW) serta obligasi negara terhadap Deklarasi dan Pelan Tindakan Beijing (*Beijing Declaration and Platform for Action*) dan Matlamat 5: Kesaksamaan Gender di bawah Matlamat Pembangunan Mampan (*Sustainable Development Goals-SDGs*).

Salah satu usaha KPWKM adalah melalui penggubalan Rang Undang-Undang Gangguan Seksual (RUU GS) yang akan menjadi salah satu instrumen bagi menghapus diskriminasi berasaskan gender, melindungi wanita dengan menyediakan persekitaran yang bebas gangguan seksual dan membolehkan mereka untuk terus menyumbangkan potensi dalam proses membangunkan diri, keluarga, masyarakat dan negara.

Perkara utama yang diberi perhatian bagi memastikan draf RUU GS yang digubal adalah komprehensif ialah dengan memastikan ia berupaya menangani kelompangan dalam sistem perundangan atau peraturan sedia ada. Selain itu, draf RUU GS turut menggariskan definisi gangguan seksual yang lebih menyeluruh dan pemakaiannya tidak hanya terhad kepada sektor pekerjaan tetapi merangkumi tempat-tempat awam.

RUU GS ini juga memperuntukkan pelantikan seorang Ketua Pengarah yang berperanan untuk memberikan nasihat yang bersesuaian kepada pihak-pihak yang terlibat untuk memastikan mereka menyedari prosedur dan pilihan yang ada dalam pengendalian kes-kes gangguan seksual. Penambahbaikan turut dilaksanakan dengan memperkenalkan mekanisme baharu bagi membolehkan kes-kes gangguan seksual dibuktikan melalui standard pembuktian sivil iaitu secara imbalan kebarangkalian (*balance of probabilities*) yang ditangani dengan penubuhan tribunal untuk penyelesaian aduan/tuntutan kes gangguan seksual yang lebih cepat dan efektif.

Secara keseluruhannya, penggubalan RUU GS ini telah mengambil kira hasrat untuk memberikan kesedaran dan pendedahan kepada umum mengenai kesalahan gangguan seksual supaya dapat mencegah gangguan seksual daripada berlaku, di samping memberikan perlindungan kepada mangsa melalui langkah *redress* yang sewajarnya.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD TARMIZI BIN SULAIMAN [SIK]

TARIKH : 3 OGOS 2020 (ISNIN)

SOALAN

Minta **MENTERI PENDIDIKAN** menyatakan langkah-langkah Kerajaan bagi memastikan kanak-kanak pemohon suaka dan pelarian Rohingya serta dari negara lain turut mendapat akses kepada sistem pendidikan yang berkualiti dan konsisten.

JAWAPAN

Tuan Yang di-Pertua,

Untuk makluman Ahli Yang Berhormat, Arahan Majlis Keselamatan Negara (MKN) No. 23 menyatakan bahawa pemegang kad UNHCR adalah berstatus Pendatang Asing Tanpa Izin (PATI), tidak berhak menuntut apa-apa hak di sisi undang-undang termasuk pendidikan. Namun, bagi membolehkan akses pendidikan kepada kanak-kanak Rohingya, pada tahun 2016 kerajaan telah memutuskan agar kanak-kanak tersebut diberikan pendidikan di Pusat Bimbingan Alternatif (PBA). Bagi tujuan tersebut, KPM telah menyediakan garis panduan penubuhan dan pendaftaran Pusat Bimbingan Alternatif (PBA).

PBA adalah satu institusi pendidikan yang memberi akses pendidikan menggunakan kurikulum negara asal atau negara ketiga. Akses pendidikan ini diberi kepada kanak-kanak bukan warganegara Malaysia berumur 4 tahun hingga 15 tahun yang tidak berpeluang mendapat akses kepada pendidikan formal, sama ada di institusi kerajaan atau swasta. Peluang pendidikan ini adalah selaras dengan dasar kerajaan terhadap pelarian Rohingya. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

**DARIPADA : Y.B. TUAN KHALID BIN ABD SAMAD
[SHAH ALAM]**

TARIKH : 3 OGOS 2020 (ISNIN)

SOALAN

TUAN KHALID BIN ABD SAMAD [SHAH ALAM] minta **MENTERI KEWANGAN** menyatakan jumlah keseluruhan pakej-pakej rangsangan ekonomi yang diumumkan ketika menghadapi pandemik COVID-19 dan status terkini pakej-pakej rangsangan tersebut.

JAWAPAN

Tuan Yang di-Pertua,

Sebagai langkah memulihkan ekonomi yang terjejas akibat penularan wabak COVID-19, Kerajaan telah memperkenalkan Pakej Rangsangan Ekonomi Prihatin Rakyat (PRIHATIN) pada 27 Mac bernilai RM250 bilion, diikuti PRIHATIN PKS Tambahan pada 6 April bernilai RM10 bilion, dan Pelan Jana Semula Ekonomi Negara (PENJANA) pada 5 Jun bernilai RM35 bilion. Keseluruhannya, pakej-pakej rangsangan ekonomi tersebut bernilai RM295 bilion, dengan RM45 bilion daripadanya merupakan suntikan fiskal langsung.

Jumlah ini mewakili lebih kurang 17% daripada Keluaran Dalam Negara Kasar (KDNK), iaitu antara yang tertinggi di Asia Tenggara. Ini menunjukkan tahap keseriusan Kerajaan dalam memastikan rakyat dilindungi dan diperkasa, perniagaan disokong dan dilonjakkan, serta ekonomi diperkukuh dan dirangsang, dalam menghadapi cabaran semasa. Prestasi pelaksanaan beberapa inisiatif utama yang berfokuskan rakyat, perniagaan dan ekonomi setakat 24 Julai 2020 adalah seperti berikut:

- i. Sebanyak RM62.8 bilion nilai moratorium pembayaran balik pinjaman telah dimanafaat oleh peminjam individu dan perniagaan;
- ii. Sebanyak RM11.14 bilion Bantuan Prihatin Nasional atau BPN telah dibayar kepada seramai 10.6 juta penerima dikalangan B40 dan M40;
- iii. Sebanyak RM8.01 bilion subsidi di bawah Program Subsidi Upah telah dibayar kepada 319 ribu majikan untuk mengekalkan sebanyak 2.53 juta pekerja;

- iv. Sebanyak RM8.9 bilion pinjaman di bawah Kemudahan Bantuan Khas atau *Special Relief Fund* (SRF) telah diluluskan oleh bank-bank tempatan dan disetuju terima oleh lebih kurang 20 ribu PKS;
- v. Sebanyak RM4 bilion projek-projek kecil bagi kontraktor kelas G1 hingga G4 seluruh negara sedang dalam pelaksanaan;
- vi. Sebanyak RM1.63 bilion telah dibayar kepada 545,000 PKS mikro di bawah inisiatif Geran Khas Prihatin yang merupakan bayaran tunai secara *one-off* bernilai RM3,000; dan
- vii. Sebanyak RM459 juta pinjaman mudah PKS mikro melalui TEKUN dan Bank Simpanan Nasional telah disalurkan kepada seramai 32.2 ribu usahawan.

Tuan Yang di-Pertua,

Pelaksanaan inisiatif-inisiatif di bawah PRIHATIN dan PENJANA di pantau dengan rapat oleh Unit Pelaksanaan dan Koordinasi Stimulus Ekonomi Antara Agensi Nasional (LAKSANA), Kementerian Kewangan. Unit LAKSANA membuat pelaporan prestasi pelaksanaan secara mingguan kepada Majlis Tindakan Ekonomi (EAC) yang dipengerusikan oleh YAB Perdana Menteri selain YB Menteri Kewangan turut membuat Laporan LAKSANA mingguan secara FB live atau siaran media yang boleh dituruti rakyat bagi mendapatkan perkembangan terkini PRIHATIN dan PENJANA.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI UTAMA HAJI MUKHRIZ BIN
TUN DR. MAHATHIR [JERLUN]**

TARIKH : 3 OGOS 2020 (ISNIN)

SOALAN

DATO' SERI UTAMA HAJI MUKHRIZ BIN TUN DR. MAHATHIR [JERLUN] minta **MENTERI PERTANIAN DAN INDUSTRI MAKANAN** menyatakan senarai insentif, rangsangan dan bantuan khas untuk petani, penternak dan nelayan dalam fasa pemulihan COVID-19.

**JAWAPAN: YB DATUK SERI DR RONALD KIANDEE,
MENTERI PERTANIAN DAN INDUSTRI MAKANAN**

Tuan Yang Dipertua,

1. Bagi memastikan aktiviti petani, pekebun, penternak, nelayan dan usahawan tani tidak terjejas oleh COVID-19, MAFI melalui Pakej Rangsangan Ekonomi PRIHATIN dan PENJANA akan melaksanakan 36 inisiatif bagi merancakkan semula aktiviti pertanian dan pengeluaran makanan.

2. Di bawah PRIHATIN, MAFI diperuntukkan sebanyak RM190 juta bagi pelaksanaan Program Jaminan Bekalan Makanan melalui insentif / subsidi, peningkatan mobilisasi dan logistik bahan makanan serta pemantapan pembekalan stok makanan. Selain itu, Pertubuhan Peladang Kawasan (PPK) dan Pertubuhan Nelayan Kawasan (PNK) juga telah diperuntukkan dana khas untuk menggalakkan penglibatan

dan aktiviti ahli peladang dan nelayan dalam industri pertanian dan makanan.

3. Kementerian Pertanian dan Industri Makanan (MAFI) melalui Pelan Jana Semula Ekonomi (PENJANA) yang diumumkan pada 5 Jun 2020 telah memperuntukkan RM400 juta bagi melaksanakan tiga (3) inisiatif dalam fasa pemulihan COVID-19:

- i. Skim Pembiayaan Mikro Kredit yang menawarkan pinjaman dengan kadar faedah 3.5% untuk tempoh 5 tahun;
- ii. Program Kebuniti / Pertanian Bandar berbentuk pemberian *in-kind* sebanyak RM500 untuk individu dan RM50,000 untuk komuniti; dan
- iii. Program Mobiliti Tenaga Kerja Agromakanan yang menawarkan insentif penggajian kepada syarikat yang menyediakan latihan semula dalam industri agromakanan.

4. Keseluruhan program / projek yang disenaraikan di bawah pakej-pakej PRE (termasuk projek infrastruktur dengan peruntukan RM50 juta), PRIHATIN dan PENJANA bernilai RM640 juta sedang dilaksanakan melalui pelbagai jabatan / agensi di bawah MAFI.

5. Kementerian berharap agar inisiatif termasuk program dan projek serta bantuan khas ini dapat membantu meringankan bebanan kumpulan sasaran yang terkesan akibat COVID-19 malahan dapat membantu keseluruhan sektor ekonomi termasuk pengusaha agromakanan untuk kembali pulih dan meneruskan kelangsungan perusahaan masing-masing bagi merancakkan semula aktiviti pertanian dan melonjakkan sektor agromakanan negara serta memastikan sekuriti makanan terus terjamin sepanjang tempoh pemulihan ekonomi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YM TENGKU ZULPURI BIN RAJA PUJI
[RAUB]**

TARIKH : 3 OGOS 2020 (ISNIN)

SOALAN

Minta **MENTERI PERTANIAN DAN INDUSTRI MAKANAN** menyatakan jumlah lesen pengeksport durian sejuk beku khususnya jenama "Musang King" dan adakah cadangan meluluskan lebih banyak bilangan lesen pengeksport untuk mengelakkan sesetengah pihak bermonopoli pasaran ini.

JAWAPAN: YB DATUK SERI DR RONALD KIANDEE,
MENTERI PERTANIAN DAN INDUSTRI MAKANAN

Yang Dipertua,

1. Pada masa kini, sebanyak 102 buah syarikat dari Malaysia telah berjaya mengeksport durian dalam bentuk buah, ulas dan pes ke seluruh dunia. Antaranya adalah negara Hong Kong, Singapura, China, Kesatuan Eropah (*European Union*) dan Timur Tengah.
2. Bagi tujuan pengeksportan ke China, pengeksport perlu memenuhi prosedur yang telah ditetapkan antaranya memenuhi keperluan Sijil Amalan Pertanian Baik (*MyGAP*), mengamalkan *Good Manufacturing Practice (GMP)* dan pembungkusan isi durian beku hendaklah memenuhi syarat Fitosanitasi, keselamatan dan piawaian kebersihan yang telah ditetapkan oleh *General Administration of Customs for the People's Republic of China (GACC)*.
3. China hanya membenarkan pengeksportan durian sejuk beku sama ada dalam bentuk buah, ulas dan pes oleh syarikat yang telah diluluskan. GACC akan melaksanakan pengauditan ke ladang penanaman durian dan fasiliti pemprosesan durian sejuk beku berdasarkan protokol yang telah dipersetujui. Sekiranya fasiliti dan ladang memenuhi protokol yang ditetapkan, maka, kelulusan akan diberikan oleh pihak GACC. Sehingga Jun 2020, sebanyak 38 fasiliti pemprosesan durian dan 75 ladang durian telah diluluskan oleh GACC.
4. MAFI sentiasa menggalakkan pengeksportan durian bagi tujuan meningkatkan pendapatan negara dan tidak pernah menghadkan bilangan pengeksport. Bagi tujuan pembangunan fasiliti pemprosesan untuk eksport, ianya memerlukan pelaburan yang tinggi. Namun, bagi tujuan tersebut, MAFI bersedia untuk memberi khidmat sokongan teknikal kepada syarikat yang memenuhi syarat-syarat yang telah ditetapkan dan mempunyai kemampuan kewangan serta bersedia memenuhi syarat yang ditetapkan oleh negara pengimport.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : PUAN NURUL IZZAH BINTI ANWAR
[PERMATANG PAUH]**

TARIKH : 3 OGOS 2020 (ISNIN)

SOALAN

Minta **MENTERI PENDIDIKAN** menyatakan :-

- (a) perancangan Kementerian membuka semula sekolah secara berselang seminggu sebagaimana di Singapura, memandangkan kecenderungan kanak-kanak menyebarkan COVID-19 adalah kurang berbanding dewasa; dan
- (b) perancangan memperkemas sistem pengajaran dalam talian apabila menurut laporan Kementerian seramai 40% pelajar Malaysia tidak memiliki alat elektronik.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) telah melaksanakan pembukaan semula sekolah secara berperingkat bermula pada 24 Jun 2020. Sebagai permulaan, pada 24 Jun 2020 hanya murid kelas peperiksaan awam, iaitu Sijil Pelajaran Malaysia, Sijil Vokasional Malaysia, Sijil Tinggi Pelajaran Malaysia dan Sijil Tinggi Agama Malaysia serta peperiksaan antarabangsa yang setara hadir ke sekolah.

Kemudian, diikuti dengan pembukaan semula prasekolah, tabika dan tadika pada 1 Julai 2020. Seterusnya, pembukaan semula sekolah untuk murid Tingkatan 6 Semester 1, Tingkatan 1 hingga Tingkatan 4, Kelas Peralihan serta Tahun 5 dan Tahun 6 pada 15 Julai 2020. Manakala, pembukaan semula sekolah bagi murid Tahun 1 hingga Tahun 4 adalah pada 22 Julai 2020.

Pada masa ini, semua sekolah KPM telah dibuka semula sepenuhnya. Pembukaan sekolah ini adalah perlu bagi membolehkan pengajaran dan pembelajaran secara bersemuka dapat dilaksanakan dengan berkesan dan dalam keadaan selamat. Berdasarkan pemantauan yang dijalankan, warga sekolah dapat mematuhi Garis Panduan Pembukaan Sekolah KPM.

Merujuk perkara berkaitan pengajaran dalam talian, untuk makluman Ahli Yang Berhormat, KPM telah menjalankan Kajian Kesiediaan Murid dalam Pembelajaran Secara dalam Talian (*Online Learning*) pada 28 Mac hingga 2 April 2020. Kajian ini melibatkan 670,118 responden yang terdiri daripada ibu bapa kepada 893,331 murid. Dapatan kajian menunjukkan 6.0 peratus murid memiliki komputer peribadi, 9.3 peratus murid memiliki komputer riba, 5.8 peratus murid memiliki tablet dan 46.5 peratus murid memiliki telefon pintar. Di samping itu, terdapat juga murid yang memiliki lebih daripada satu peranti bagi kegunaan pembelajaran secara dalam talian. Namun, dalam masa yang sama, masih terdapat 36.9 peratus murid yang tidak mempunyai sebarang peranti bagi membolehkan mereka mengikuti pembelajaran secara dalam talian.

Dapatan ini menunjukkan bahawa sebahagian besar murid tidak dapat mengikuti pembelajaran secara dalam talian dengan berkesan kerana tidak memiliki peranti bersesuaian. Di samping itu, terdapat juga kekangan dalam aspek tahap akses internet yang terhad. Ini merupakan antara cabaran besar kerana pembelajaran tidak dapat berlaku secara menyeluruh dan seragam kepada semua murid. Selain itu, PdP secara dalam talian merupakan sesuatu yang baharu untuk kebanyakan guru, murid dan ibu bapa. Mereka masih memerlukan masa untuk menyesuaikan diri dengan kaedah baharu ini.

Bagi membantu kumpulan murid yang tidak mempunyai akses kepada talian internet dan alat peranti yang sesuai untuk pembelajaran secara dalam talian, *Home-based Learning* turut dilaksanakan melalui siaran TV Pendidikan. Siaran dilaksanakan melalui saluran TV Okey dan saluran Tutor TV Astro 601 dan 603. Rancangan radio pendidikan juga telah dilaksanakan menerusi siaran Kedah FM, Terengganu FM dan Johor FM.

Terdapat juga guru yang melaksanakan PdP melalui serahan bahan pembelajaran kepada murid. Serahan bahan ini dibuat melalui pelbagai kaedah seperti perkhidmatan pos, bantuan penghantaran oleh Persatuan Ibu Bapa Guru (PIBG) dan kaunter pandu lalu di sekolah.

Segala usaha yang dilaksanakan ini jelas menunjukkan pihak sekolah serta guru begitu komited dan telah berusaha bersungguh-sungguh dalam melaksanakan tanggungjawab untuk memastikan murid tidak ketinggalan dalam mengikuti pembelajaran. KPM ingin merakamkan penghargaan kepada semua guru atas segala usaha yang telah dilaksanakan bagi memastikan pengajaran dan pembelajaran diteruskan walaupun dalam keadaan yang mencabar. Selain itu, KPM juga turut menghargai peranan ibu bapa dalam memastikan pengajaran dan pembelajaran di rumah berjalan dengan baik.

Walaupun kaedah *Home-based Learning* telah dilaksanakan di sepanjang tempoh PKP, namun masih terdapat pelbagai cabaran yang perlu diatasi. Kepelbagaian latar belakang demografi dan sosio-ekonomi murid merupakan antara faktor yang memberi impak kepada keberkesanan pelaksanaan *Home-based Learning*. Memandangkan kaedah *Home-based Learning* ini merupakan sesuatu yang baharu, maka guru, murid dan ibu bapa memerlukan lebih masa untuk menyesuaikan diri.

KPM akan sentiasa berusaha untuk meningkatkan lagi keberkesanan kaedah *Home-based Learning* ini dari semasa ke semasa. Buat masa ini, KPM sedang merangka strategi pelaksanaan yang komprehensif dalam memperkasa pendidikan digital, termasuk pelaksanaan *Home-based Learning*.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. XAVIER JAYAKUMAR A/L
ARULANANDRAM [KUALA LANGAT]**

TARIKH : 3 OGOS 2020 [ISNIN]

SOALAN

Minta MENTERI TENAGA DAN SUMBER ASLI menyatakan apa rancangan Kementerian untuk melindungi dan mengurus Kompleks Hutan Ulu Muda. Dalam usaha melindungi kepelbagaian biologi dan khazanah hutan Malaysia, pihak berkuasa persekutuan dan negeri mesti bekerjasama serta berganding bahu. Mengapa pihak berkuasa persekutuan melengah-lengahkan usaha Pemindahan Fiskal Ekologi (*Ecological Fiscal Transfer*) kepada pihak berkuasa negeri yang sedang giat melakukan program memulihara dan memelihara sumber alam semula jadinya.

JAWAPAN

Tuan Yang di-Pertua,

1. Untuk makluman Tuan Yang di-Pertua, luas keseluruhan kawasan Hutan Simpan Ulu Muda ialah 106,418 hektar dan telah diwartakan sebagai Hutan Simpanan Kekal (HSK) di bawah Seksyen 7 Akta Perhutanan Negara 1984 [Akta 313] oleh Pihak Berkuasa Negeri Kedah. Daripada jumlah tersebut seluas 16,229 hektar telah diwartakan sebagai Hutan Tadahan Air manakala seluas 11,118 hektar telah diwartakan sebagai Hutan Taman Negeri di bawah Seksyen 10 (1) dalam akta yang sama.

2. Bagi membantu Kerajaan Negeri melindungi dan menguruskan kawasan ini, permohonan peruntukan di bawah Rancangan Malaysia Kedua Belas (RMKe-12) telah dikemukakan untuk pertimbangan Unit Perancang Ekonomi, Jabatan Perdana Menteri yang akan melibatkan perancangan dan pelaksanaan aktiviti seperti berikut :

- (i) Penyediaan pelan tindakan pengurusan Taman Negeri Ulu Muda;
- (ii) Pembangunan infrastruktur yang berkaitan; dan
- (iii) Pembangunan modal insan serta peningkatan kesedaran masyarakat.

3. Mengenai pelaksanaan Ecological Fiscal Transfer for Biodiversity Conservation (EFT), Kerajaan Persekutuan telah memperuntukkan sebanyak RM60 juta di bawah Bajet 2019 bagi menggalakkan Kerajaan Negeri melindungi dan memulihara kawasan perlindungan (*protected areas - PA*).

4. Majlis Kewangan Negara yang bersidang pada 27 Mei 2019 telah bersetuju untuk menyalurkan peruntukan tersebut bagi membiayai kadar baharu Pemberian Berdasarkan Tahap Pembangunan Ekonomi, Infrastruktur dan Kesejahteraan Hidup (TAHAP) untuk melindungi kawasan perlindungan hutan dan marin serta membantu Negeri-Negeri yang berpendapatan rendah melaksanakan program/projek bagi meningkatkan hasil negeri. Pengagihan peruntukan kepada Kerajaan Negeri telah dilaksanakan mulai Mei 2019 dan telahpun selesai.

5. Kementerian telah memohon peruntukan daripada Kementerian Kewangan (MOF) bagi tujuan EFT pada tahun 2020. Walau bagaimanapun, tiada peruntukan diluluskan oleh MOF untuk EFT pada tahun 2020. Kementerian akan memohon peruntukan daripada Kementerian Kewangan bagi meneruskan inisiatif EFT dalam bajet 2021. Kementerian juga akan mencadangkan formula pengagihan yang lebih komprehensif dengan memberi penekanan kepada kriteria kualiti pengurusan kawasan perlindungan dan usaha yang diambil oleh Kerajaan Negeri untuk menambah kawasan perlindungan yang baharu.

Sekian, terima kasih

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : SYED SADDIQ BIN SYED ABDUL
RAHMAN [MUAR]**

TARIKH : 03 OGOS 2020 (ISNIN)

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI PEMBANGUNAN WANITA, KELUARGA DAN MASYARAKAT** menyatakan untuk memberi penjelasan berkenaan pelantikan anggota Parlimen Parit, Mohd Nizar Zakaria sebagai pengerusi Lembaga Penduduk dan Pembangunan Keluarga Negara (LPPKN) yang baru.

.

JAWAPAN

Tuan Yang di-Pertua,

Saya mengambil maklum atas keprihatinan YB mengenai lantikan Pengerusi Lembaga Penduduk dan Pembangunan Keluarga Negara (LPPKN) yang baharu. Terlebih dahulu, terima kasih diucapkan kepada mantan Pengerusi LPPKN iaitu YBhg. Datuk Dr. Narimah Awini atas jasa-jasa dan sumbang bakti yang dicurahkan kepada negara dalam memperkasa isu kependudukan dan kekeluargaan sepanjang tempoh beliau berkhidmat di LPPKN.

Tahniah juga diucapkan kepada YB Dato' Mohd Nizar bin Haji Zakaria yang telah dilantik sebagai Pengerusi LPPKN yang ke-11, bagi tempoh dua (2) tahun mulai 15 Jun 2020. Pelantikan Pengerusi LPPKN yang terkini adalah berdasarkan keperluan yang mendesak yang perlu dilaksanakan segera mengikut hala tuju Kerajaan baharu. Pelantikan tersebut adalah berdasarkan prosedur operasi standard mengikut Seksyen 4.3 Surat Pekeliling Am Bilangan 3 Tahun 1998. Proses pelantikan, gaji dan elaun adalah sama dengan pelantikan pengerusi LPPKN yang sebelum ini.

Saya percaya sepenuhnya bahawa pengerusi LPPKN baharu yang dilantik mempunyai tahap integriti yang tinggi di samping memahami peranan Kerajaan dalam pengurusan sosioekonomi yang merangkumi pembangunan sosial dan pembangunan ekonomi. Saya berharap supaya aspirasi LPPKN untuk memacu agenda kependudukan dan kekeluargaan yang inovatif dapat dicapai dengan pelantikan baharu ini.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. TUAN NOOR AMIN BIN AHMAD
[KANGAR]**

TARIKH : 3 OGOS 2020 (ISNIN)

SOALAN

TUAN NOOR AMIN BIN AHMAD [KANGAR] minta **MENTERI KEWANGAN** menyatakan senarai semua bon Kerajaan yang diterbitkan dan jumlah aset Kerajaan dan syarikat berkaitan Kerajaan yang telah dijual sejak 1 Mac 2020 hingga kini.

JAWAPAN

Tuan Yang di-Pertua,

1. Seajar dengan peraturan kewangan yang telah ditetapkan seperti yang termaktub di dalam Akta Pinjaman (Tempatan) 1959, Akta Pendanaan Kerajaan 1983 dan Akta Pinjaman Luar Negeri 1963, pinjaman hanya dibuat untuk membiayai semula hutang yang matang dan membiayai perbelanjaan pembangunan. Bagi tempoh setengah tahun pertama 2020, Kerajaan telah menerbitkan bon dan sukuk sebanyak RM100.8 bilion. Daripada jumlah tersebut, sebanyak RM41 bilion digunakan untuk membiayai semula hutang yang matang manakala RM59.8 bilion adalah untuk membiayai defisit fiskal bagi tempoh yang sama dan *prefunding* kertas hutang yang akan matang dalam suku ketiga 2020.

2. Dari semasa ke semasa, Kerajaan akan mengenal pasti peluang untuk merasionalisasikan syarikat-syarikat MKD terutama bagi syarikat yang telah mencapai mandat dan objektif penubuhannya ataupun sudah

tidak relevan dengan objektif awal penubuhannya, melupuskan pegangan dalam syarikat yang mempunyai nilai komersil atau memberikan kesan *crowding out* dalam pasaran, atau menutup syarikat yang mengakibatkan beban kewangan kepada negara.

3. Dari Mac sehingga Jun 2020, Syarikat Berkaitan Kerajaan, Khazanah Nasional Berhad (Khazanah), dalam melaksanakan operasi pembelian dan pelupusan aset secara strategik yang berterusan, telah membuat pelupusan atas aset dan pegangan saham miliknya berjumlah kira-kira RM5.1 bilion. Dalam tempoh tersebut, aset dan saham yang dilupuskan adalah dalam pelbagai sektor dan industri yang terletak di dalam dan luar negara, termasuk telekomunikasi, tenaga, pelaburan, perkhidmatan kewangan, teknologi, ujian semikonduktor dan hartanah. Pelupusan tersebut adalah secara separa atau keseluruhan pegangan milik Khazanah sementara kaedah pelupusan pula adalah menerusi pelupusan di pasaran terbuka, penebusan bon, penempatan saham dan pelupusan peribadi. Selain daripada pelupusan oleh Khazanah, tiada syarikat Menteri Kewangan Diperbadankan (MKD) yang dijual atau pegangan saham oleh MKD yang dilupuskan oleh Kerajaan sejak 1 Mac 2020 hingga kini.

4. Untuk makluman Tuan Yang di-Pertua, tiada sebarang penjualan atau pelupusan tanah milik Kerajaan Persekutuan dibuat selepas 9 Mei 2018 sehingga kini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHA KEE CHIN [RASAH]

TARIKH : 03 OGOS 2020 (ISNIN)

SOALAN

Minta **MENTERI PENDIDIKAN** menyatakan apakah status terkini pelaksanaan Program Sarapan Percuma untuk murid-murid sekolah termasuk jumlah murid dan sekolah yang mendapat faedah daripada program ini dan bilakah program ini akan diperluaskan secara menyeluruh.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) tidak akan meneruskan Program Sarapan Pagi. Perkara ini telah diputuskan oleh kerajaan pada Januari 2020 dengan mengambil kira implikasi kos pelaksanaan dan kelestarian program. Jemaah Menteri juga memutuskan supaya program rancangan makanan sedia ada untuk murid sekolah rendah, iaitu Program Rancangan Makanan Tambahan (RMT) diteruskan dengan beberapa penambahbaikan.

Sehubungan itu, KPM telah melaksanakan Penambahbaikan Program Rancangan Makanan Tambahan (PPRMT) mulai 20 Januari 2020. Program ini memberi manfaat kepada 4,873 orang murid di 100 buah sekolah terpilih seluruh negara. Anggaran perbelanjaan bagi pelaksanaan PPRMT adalah sebanyak RM2.4 juta setahun. Antara penambahbaikan yang dilaksanakan dalam PPRMT ialah:

- a) kumpulan murid yang layak telah diperluaskan daripada keluarga dalam kategori miskin tegar ke kategori miskin berdasarkan Jadual Paras Garis Kemiskinan (PGK) Nasional; dan
- b) waktu pelaksanaan PPRMT ditetapkan sebelum sesi pengajaran dan pembelajaran bermula. Bagi murid sesi pagi, waktu makan adalah pada jam 7.00 pagi hingga 7.30 pagi. Manakala, bagi murid sesi petang, waktu makan adalah pada jam 12.30 tengah hari hingga 2.00 petang.

Dalam masa yang sama, KPM juga masih meneruskan Program RMT sedia ada di semua sekolah rendah KPM. Program ini memberi manfaat kepada 473,617 murid dengan peruntukan sebanyak RM295 juta bagi tahun 2020. Kriteria yang ditetapkan untuk penerima RMT sedia ada adalah seperti berikut:

- a) murid warganegara Malaysia dari Tahun 1 hingga Tahun 6 di semua sekolah kerajaan dan sekolah bantuan kerajaan;
- b) murid dalam keluarga yang pendapatan Isi Rumah (IR) adalah di bawah PGK (kategori miskin tegar);
- c) murid sekolah Orang Asli / Penan (kecuali yang tinggal di asrama); dan
- d) Murid Berkeperluan Khas (OKU).

Selain daripada menyediakan makanan berkhasiat, murid juga diberikan pendedahan mengenai pendidikan kesihatan dengan mengamalkan pengambilan sarapan serta gaya hidup sihat. Program ini juga dapat menerapkan nilai murni, pembinaan sahsiah diri dan disiplin melalui amalan adab dan etika makan dalam kalangan murid.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

**DARIPADA : Y.B. DATO' SERI DR. WAN AZIZAH
WAN ISMAIL [PANDAN]**

TARIKH : 3 OGOS 2020 (ISNIN)

SOALAN

DATO' SERI DR. WAN AZIZAH WAN ISMAIL [PANDAN] minta **MENTERI KEWANGAN** menyatakan ringkasan Belanjawan 2020 yang diunjur semula merangkumi Pendapatan, Belanja Operasi, Belanja Pembangunan, Lebihan/Defisit Keseluruhan, KDNK (nominal), dan Peratusan Defisit Keseluruhan, berikutan wabak COVID-19 dan pakej rangsangan serta perbandingannya dengan Belanjawan 2020 asal yang telah diluluskan.

JAWAPAN

Tuan Yang di-Pertua,

1. Semasa pembentangan Belanjawan 2020 pada 11 Oktober 2019, Kerajaan telah mengumumkan unjuran jumlah hasil Kerajaan Persekutuan bagi tahun 2020 sebanyak RM244.5 bilion. Daripada jumlah tersebut, hasil cukai dianggar sebanyak RM189.9 bilion atau 77.7% daripada keseluruhan hasil, manakala hasil bukan cukai berjumlah RM54.6 bilion atau 22.3%. Perbelanjaan mengurus diperuntukkan sebanyak RM241 bilion manakala perbelanjaan pembangunan sebanyak RM56 bilion. Sehubungan itu, kedudukan defisit diunjur pada paras 3.2% daripada KDNK.

2. Susulan penularan pandemik COVID-19, Kerajaan telah memperkenalkan pakej rangsangan dan pelan pemulihan ekonomi bernilai RM295 bilion untuk membantu rakyat yang terkesan dan

perniagaan yang terjejas serta menyokong pemulihan pertumbuhan ekonomi negara. Namun, pakej dan pelan berkenaan hanya melibatkan suntikan fiskal berjumlah RM45 bilion. Setelah mengambil kira pengurangan hasil berikutan unjuran Keluaran Dalam Negeri Kasar (KDNK) yang lebih rendah dan kejatuhan harga minyak mentah dunia serta pertambahan perbelanjaan bagi merangsang dan memulihkan ekonomi, kedudukan defisit fiskal pada tahun 2020 dijangka meningkat kepada sekitar 5.8% hingga 6.0% daripada KDNK.

3. Kerajaan juga sedang meneliti dan memantau secara menyeluruh persekitaran ekonomi global dan harga minyak mentah dunia yang tidak menentu. Kedudukan kewangan tahun 2020 yang disemak semula akan dibentangkan bersekali dengan anggaran kedudukan kewangan tahun 2021 dalam Belanjawan 2021 yang dijadualkan pada 6 November 2020.

4. Semua langkah yang telah diumumkan dalam pakej rangsangan dan pemulihan ekonomi tersebut adalah bersifat *one-off* dan tidak akan terus membebankan kewangan Kerajaan Persekutuan dalam jangka masa sederhana dan panjang. Ini adalah antara strategi Kerajaan bagi mengurangkan defisit fiskal dalam jangka masa sederhana secara berperingkat seterusnya memastikan kedudukan fiskal dan hutang negara kekal pada paras terkawal. Kerajaan akan meneruskan langkah konsolidasi fiskal dengan memberi tumpuan kepada usaha untuk meningkat dan mempelbagaikan kutipan hasil serta menambah baik kecekapan perbelanjaan bagi mengukuhkan lagi kedudukan kewangan Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHAN MING KAI [ALOR SETAR]

TARIKH : 3 OGOS 2020

SOALAN

Minta MENTERI PERTANIAN DAN INDUSTRI MAKANAN menyatakan mengapa konsesi syarikat penghasilan benih padi subsidi dipanjangkan sedangkan tender baru telah dibuka dan adakah syarikat baru dibenarkan masuk tender ataupun semestinya kuota tertentu wajib diberi kepada GLC.

**JAWAPAN: YB DATUK SERI DR RONALD KIANDEE,
MENTERI PERTANIAN DAN INDUSTRI MAKANAN**

Tuan Yang Dipertua,

1. Untuk makluman Ahli Yang Berhormat, pelanjutan bagi pembekalan benih padi sah kepada syarikat pembekal sedia ada dilaksanakan dalam tempoh setahun lagi kerana terdapat masalah teknikal dalam proses perolehan tender. Sehubungan itu, pembekalan benih padi sah kepada syarikat sedia ada dilanjutkan dengan mengambilkira faktor-faktor berikut:

- i) Perancangan ladang dan penanaman benih padi mengambil masa enam bulan (satu musim). Keperluan benih padi sah di lapangan iaitu kawasan penanaman padi di dalam jelapang dan luar jelapang bagi musim penanaman akan terjejas sekiranya tidak mendapat bekalan benih padi sah. Keadaan ini akan menimbulkan rungutan pesawah dan dikhuatiri akan menyebabkan individu yang tidak bertanggungjawab mengeluarkan benih tidak sah dan seterusnya menjejaskan industri beras negara;

ii) Proses perolehan tender mengambil masa dalam tempoh enam bulan meliputi pemeriksaan dalam aspek audit teknikal di kilang-kilang benih padi, stor penyimpanan dan ladang benih padi; dan

iii) Memastikan jaminan makanan (*food security*) bagi industri padi dan beras tetap terjamin disamping tidak menjejaskan pendapatan pesawah.

2. Penilaian telah dilakukan terlebih dahulu oleh Jawatankuasa Penilaian Teknikal untuk mengagihkan kuota pengeluaran benih padi sah berdasarkan aspek teknikal yang diambil kira. Penilaian kewangan juga dilakukan bagi menilai prestasi kewangan pemegang tender. Pemegang tender yang berjaya akan ditentukan kuota pembekalan berdasarkan kapasiti pembekal dan keperluan benih di lapangan. Dalam pelaksanaan pembekalan benih padi sah, semua pihak yang berminat adalah terbuka untuk memohon kepada Kerajaan sebagai pengeluar benih padi sah tetapi tertakluk kepada syarat-syarat yang telah ditetapkan. Pada masa ini, sembilan (9) pengeluar benih padi sah yang telah dilantik oleh pihak Kerajaan melalui proses saringan dan prosedur perolehan yang ketat. Semua yang berminat dialu-alukan untuk masuk tender dan tiada syarat khusus bagi pemilihan GLC.

3. Bagi pelaksanaan tender akan datang, Kementerian akan melaksanakan audit teknikal, audit kewangan serta audit lokasi oleh Kawal Selia Padi dan Beras (KPB) sama ada syarikat mematuhi Akta Kawalan Padi dan Beras 1994 (Akta 522) serta Peraturan-Peraturan yang dibuat di bawahnya sebagai loji benih padi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN OSCAR LING CHAI YEW [SIBU]

TARIKH : 3 OGOS 2020 (ISNIN)

SOALAN

TUAN OSCAR LING CHAI YEW [SIBU] minta **MENTERI PERTANIAN DAN INDUSTRI MAKANAN** menyatakan adakah Kementerian ingin membantu golongan graduan untuk terlibat dalam pertanian moden seperti tanaman fertigasi, nanoteknologi dan kaedah moden yang lain seperti hidroponik. Dengan cara ini, sekali gus membantu golongan pelajar mendapatkan pendapatan dan membekalkan bekalan makanan kepada masyarakat setempat.

**JAWAPAN: YB DATUK SERI DR RONALD KIANDEE,
MENTERI PERTANIAN DAN INDUSTRI MAKANAN**

Tuan Yang Dipertua,

Kementerian Pertanian dan Industri Makanan (MAFI) sentiasa peka dan bersedia untuk membantu golongan graduan melibatkan diri dalam sektor agromakanan. Pelbagai inisiatif dan program telah disediakan untuk memperkasa golongan graduan di dalam pertanian moden seperti tanaman fertigasi, nanoteknologi dan hidroponik. Untuk makluman Yang Berhormat, Kementerian telah mengambil inisiatif-inisiatif berikut:

1) Perluasan skop Program Agropreneur Muda di bawah bidang tanaman meliputi sistem fertigasi, tanaman hidroponik, akuaponik dan penggunaan agroteknologi. Pada **tahun 2016 hingga 2020**, seramai **898 orang belia** telah mendapat kelulusan Geran Agropreneur Muda bagi

menjalankan **projek-projek fertigasi** berjumlah **RM 16.3 juta**. Manakala bagi **projek-projek hidroponik dan akuaponik**, Kementerian telah meluluskan perluasan skop tersebut mulai Jun 2020.

Bagi pencapaian keseluruhan dari tahun **2016 sehingga Jun 2020**, seramai **6,005** orang peserta agropreneur muda dari seluruh negara telah mendapat manfaat daripada Geran Agropreneur Muda yang melibatkan peruntukan **RM104 juta**. Jumlah pembiayaan khas agropreneur muda (pinjaman) pula adalah seramai **58** usahawan berjumlah **RM3.9 juta** dari **tahun 2017 hingga Mei 2020**.

2) Kementerian juga telah melaksanakan **Program Latihan Kemahiran Pertanian Kebangsaan (PLKPK)** di bawah Pendidikan dan Latihan Teknikal dan Vokasional (TVET). Program PLKPK yang diiktiraf oleh Jabatan Pembangunan Kemahiran (JPK), Kementerian Sumber Manusia (KSM) ini menawarkan pembelajaran di peringkat **Sijil Kemahiran Malaysia (SKM)** dan **Diploma Kemahiran Malaysia (DKM)** yang merangkumi sembilan (9) bidang. Antaranya tanaman, ruminan, akuakultur, teknologi penangkapan ikan dan pemasaran.

Dari tahun 1969 sehingga tahun 2019, seramai **19,565 orang graduan** telah berjaya dilahirkan. **Penggunaan teknologi moden** dalam pertanian merupakan di antara silibus pembelajaran yang digunapakai dalam PLKPK seperti tanaman **cili fertigasi, hidroponik**, penggunaan simulasi elektronik dan sebagainya.

Sekian, terima kasih.

**SIDANG DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN GOBIND SINGH DEO [PUCHONG]

TARIKH : 3 OGOS 2020 (ISNIN)

SOALAN

minta **MENTERI KOMUNIKASI DAN MULTIMEDIA** menyatakan apakah strategi Kementerian untuk menggalakkan perniagaan dan pelajaran digital untuk seluruh negara khususnya selepas wabak COVID-19 di kawasan dalam dan luar bandar.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian sedang meneruskan usaha dalam membantu usahawan tempatan beralih daripada perniagaan secara konvensional kepada ekonomi digital melalui penggunaan teknologi seiring dengan perubahan semasa bagi membantu meransang pertumbuhan ekonomi negara. Antara strategi yang sedang dijalankan adalah dengan menaik taraf kualiti perkhidmatan jalur lebar khususnya di kawasan dalam dan luar bandar. Di antara inisiatif yang dilaksanakan adalah pembinaan menara komunikasi baharu bagi penyediaan liputan perkhidmatan selular 3G dan 4G. Bagi peluasan jalur lebar talian tetap pula, inisiatif yang melibatkan penyambungan rangkaian gentian optik baharu kepada 100,000 premis di pinggir bandar dan luar bandar sedang dirancang.
2. Dalam inisiatif menggalakkan perniagaan digital, Kementerian Komunikasi dan Multimedia melalui Malaysia Digital Economy Corporation (MDEC) akan meneruskan pelbagai aplikasi dan platform e-dagang kepada Perusahaan Kecil dan Sederhana (PKS) dan Usahawan mikro tempatan melalui program dan inisiatif seperti berikut:
3. Program eUsahawan yang menyediakan pengetahuan dan ilmu keusahawanan digital kepada usahawan mikro, desa dan belia untuk menjana pendapatan, menjalankan pemasaran produk dan meningkatkan penjualan.
4. Perkhidmatan eDagang Setempat (PeDAS) yang menyediakan perkhidmatan khidmat nasihat dan bantuan sokongan kepada usahawan luar bandar memasarkan produk mereka di platform e-dagang. Kemudahan PeDAS tersedia di Pusat Internet Desa (PID) di bawah Kementerian Komunikasi dan Multimedia Malaysia (KKMM) dengan kerjasama MDEC.

NO. SOALAN : 31

5. Zon Perdagangan Bebas Digital (DFTZ) merupakan salah satu inisiatif e-dagang rentas sempadan. Fokus diberikan untuk menggalakkan eksport di kalangan PKS menerusi pelbagai ekosistem yang tersedia di platform e-dagang. Sehingga akhir tahun lepas, DFTZ telah membantu lebih 13,000 PKS tempatan mendapatkan akses ke pasaran e-dagang serantau dan global
6. Go-eCommerce merupakan pusat sumber dalam talian yang mempunyai pelbagai rujukan dan panduan lengkap untuk membantu PKS dan usahawan mikro untuk menyertai dan menggunakan aplikasi e-dagang.
7. Di bawah Pelan Jana Semula Ekonomi Negara (PENJANA), MDEC juga melaksanakan inisiatif seperti berikut yang bertujuan menggalakkan penggunaan platform e-dagang serta teknologi digital dalam operasi perniagaan khususnya oleh Perusahaan Kecil dan Sederhana (PKS):
 - a. Kempen eDagang untuk Usahawan Mikro dan PKS yang bertujuan untuk menggalakkan usahawan mikro dan PKS menggunakan platform dan aplikasi e-dagang untuk meluaskan pasaran mereka. Inisiatif ini dijangka akan memanfaatkan lebih 145,000 usahawan mikro dan PKS tempatan untuk mendapat bantuan dalam bentuk latihan *on-boarding* di platform e-dagang dan subsidi penjualan dan khidmat sokongan jualan. Dalam melaksanakan inisiatif ini, MDEC akan memanfaatkan maklumat PKS daripada program sedia ada seperti eUsahawan, Go-commerce, dan PeDAS. MDEC juga akan bekerjasama dengan Kementerian-Kementerian dan agensi-agensi pembangunan usahawan lain serta rakan-rakan e-dagang bagi memastikan golongan sasaran ini mendapat manfaat daripada program ini.
 - b. Kempen *Shop Malaysia Online* yang merupakan kempen jualan e-dagang untuk menggalakkan pembelian dalam talian melalui pemberian boucher, diskaun dan rebat. Inisiatif ini menumpukan usaha menggalakkan dan meningkatkan jualan dalam talian untuk produk dan barangan PKS tempatan. Di samping itu, inisiatif ini

NO. SOALAN : 31

turut bertujuan untuk menarik lebih banyak PKS tempatan menggunakan platform e-dagang dan menggalakkan eksport produk tempatan melalui platform e-dagang antarabangsa. Pelaksanaan inisiatif ini juga akan melibatkan kerjasama dari pelbagai Kementerian, agensi, rakan industri dan platform e-dagang tempatan dan antarabangsa.

c. Geran Automasi Pintar atau *Smart Automation Grant* (SAG) yang merupakan bantuan kewangan dan bentuk geran padanan untuk syarikat-syarikat perkhidmatan mengautomasikan proses dan operasi perniagaan mereka dengan penggunaan teknologi digital. Inisiatif ini bertujuan untuk menggalakkan syarikat tempatan memanfaatkan teknologi digital untuk meningkatkan produktiviti serta mengurangkan kos operasi dan kebergantungan kepada proses manual. Mekanisme pelaksanaan Geran ini juga melibatkan kerjasama institusi kewangan dan rakan industri seperti syarikat telekomunikasi dan pakar industri.

8. Dalam menggalakkan pembelajaran secara digital dan dalam talian, MDEC juga turut bekerjasama dengan pihak Kementerian Pendidikan dan Kementerian Pengajian Tinggi bagi melaksanakan program yang melibatkan pelajar dan tenaga pengajar. Antara program yang dilaksanakan sepanjang tempoh PKP termasuk:

a. Melalui program #mydigitalmaker, MDEC telah melatih lebih 3,000 guru secara dalam talian dalam bidang pengaturcaraan *micro controller* dan Kemahiran Komputasional. Guru-guru yang telah dilatih dan dikenalpasti sebagai Jurulatih Utama Daerah akan melatih guru-guru lain di daerah masing-masing.

b. Kempen "*Hour of Code* (HoC)" turut dijalankan secara dalam talian dalam memperkenalkan pengaturcaraan serta asas sains komputer dalam cara yang interaktif kepada murid sekolah rendah dan menengah dengan kerjasama KPM dan MOSTI.

NO. SOALAN : 31

c. Roadshow Kaunselor Kerjaya turut berlangsung secara dalam talian melibatkan 500 guru-guru kaunselor kerjaya sekolah dilaksanakan secara berfasa mulai bulan Mei – Julai bertujuan untuk memberi pendedahan dan maklumat terkini tentang kemahiran-kemahiran digital yang diperlukan oleh murid dan kerjaya masa depan. Guru-guru kaunselor tersebut akan membuat pendedahan kepada anggaran 20,000 murid Tingkatan 5 di sekolah masing-masing.

9. Di samping itu, selain daripada menawarkan pakej prabayar dan pascabayar yang berpatutan, syarikat-syarikat telekomunikasi turut menawarkan internet percuma 1Gigabit setiap hari di bawah Pelan Jana Semula Ekonomi Negara. Kemudahan ini dapat dimanfaatkan oleh seluruh rakyat dalam menggunakan perkhidmatan jalur lebar bagi tujuan perniagaan dan pembelajaran digital.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DR. LEE BOON CHYE [GOPENG]

TARIKH : 3 OGOS 2020 (ISNIN)

SOALAN

DR. LEE BOON CHYE [GOPENG] minta **MENTERI PERTANIAN DAN INDUSTRI MAKANAN** menyatakan usaha dan dasar Kerajaan untuk menjamin keselamatan makanan sepanjang pandemik COVID-19.

**JAWAPAN: YB DATUK SERI DR RONALD KIANDEE,
MENTERI PERTANIAN DAN INDUSTRI MAKANAN**

Tuan Yang Dipertua,

1. Kementerian Pertanian dan Industri Makanan (MAFI) telah melaksanakan usaha berikut bagi menjamin keselamatan makanan (*food security*) sepanjang pandemik COVID-19:

- i. Memastikan aktiviti pertanian dan pengeluaran makanan diteruskan dalam tempoh pelaksanaan Perintah Kawalan Pergerakan (PKP) dengan mengkategorikan aktiviti-aktiviti berkenaan sebagai perkhidmatan penting (*essential services*) dan mengeluarkan surat sokongan kepada pengusaha yang terlibat;
- ii. Meningkatkan keberkesanan pengeluaran dengan menambahbaik infrastruktur dan kemudahan seperti jalan dan fasiliti ladang, pengaliran dan saliran kawasan sawah

padi serta kompleks dan jeti pendaratan ikan melalui Pakej Rangsangan Ekonomi (PRE);

- iii. Meningkatkan kecekapan rantai bekalan dan logistik dengan memantapkan kemudahan pusat pengumpulan, penyimpanan, pemprosesan, pengedaran dan pengangkutan melalui PRIHATIN;
- iv. Memperluas akses pasaran pengusaha tani melalui outlet pemasaran seperti pasar tani, pasar nelayan, Agrobazaar dan MyFarmOutlet;
- v. Menggalakkan penyertaan usahawan dalam platform e-dagang seperti Agrobazaar Online, NEKMATBIZ dan platform kerjasama strategik dengan pihak swasta seperti Lazada dan Shoppe; dan
- vi. Menggalakkan dan merencanakan semula aktiviti pertanian dan pengeluaran makanan melalui Pelan Jana Semula Ekonomi Negara (PENJANA).

2. Selain itu, bagi mengurangkan isu lambakan hasil pertanian dan meminimumkan kerugian yang dialami, Kementerian melalui jabatan dan agensi seperti Lembaga Pemasaran Pertanian Persekutuan (FAMA) telah melaksanakan Program Pasar Segar Terkawal (PST). Pelaksanaan PST semasa PKP adalah signifikan bagi memastikan bekalan makanan negara stabil dan berterusan.

3. Bagi memastikan aktiviti petani, pekebun, penternak, nelayan dan usahawan tani tidak terjejas oleh COVID-19, MAFI melalui PRE, PRIHATIN dan PENJANA akan melaksanakan 36 inisiatif bagi merencanakan semula aktiviti pertanian dan pengeluaran makanan.

4. Di bawah PRIHATIN, MAFI diperuntukkan sebanyak RM190 juta bagi pelaksanaan Program Jaminan Bekalan Makanan melalui insentif / subsidi, peningkatan mobilisasi dan logistik bahan makanan serta pemantapan pembekalan stok makanan. Selain itu, Pertubuhan Peladang Kawasan (PPK) dan Pertubuhan Nelayan Kawasan (PNK)

juga telah diperuntukkan dana khas untuk menggalakkan penglibatan dan aktiviti ahli peladang dan nelayan dalam industri pertanian dan makanan.

5. Di bawah PENJANA, MAFI telah diperuntukkan sebanyak RM400 juta untuk melaksanakan tiga (3) inisiatif khusus seperti berikut:

- i. Skim Pembiayaan Mikro Kredit yang menawarkan pinjaman dengan kadar faedah 3.5% untuk tempoh 5 tahun;
- ii. Program Kebuniti atau Berkebun secara berkomuniti di bandar dan luar bandar, berbentuk pemberian *in-kind* sebanyak RM500 untuk individu dan RM50,000 untuk komuniti; dan
- iii. Program Mobiliti Tenaga Kerja Agromakanan yang menyediakan latihan semula dalam industri agromakanan.

6. Keseluruhan program / projek yang disenaraikan di bawah pakej-pakej PRE (termasuk projek infrastruktur dengan peruntukan RM50 juta), PRIHATIN dan PENJANA bernilai RM640 juta sedang dilaksanakan melalui pelbagai jabatan / agensi di bawah MAFI.

7. Kementerian berharap agar inisiatif termasuk program dan projek serta bantuan khas ini dapat membantu meringankan bebanan kumpulan sasar yang terkesan akibat COVID-19 malahan dapat membantu keseluruhan sektor ekonomi termasuk pengusaha agromakanan untuk kembali pulih dan meneruskan kelangsungan perusahaan masing-masing bagi merancakkan semula aktiviti pertanian dan melonjakkan sektor agromakanan negara serta memastikan sekuriti makanan terus terjamin sepanjang tempoh pemulihan ekonomi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI SAIFUDDIN NASUTION BIN
ISMAIL [KULIM BANDAR BARU]**

TARIKH : 3 OGOS 2020

SOALAN

Minta MENTERI PERTANIAN DAN INDUSTRI MAKANAN menyatakan langkah Kementerian menjelang tamatnya monopoli import beras yang kini dikuasai BERNAS.

**JAWAPAN: YB DATUK SERI DR RONALD KIANDEE,
MENTERI PERTANIAN DAN INDUSTRI MAKANAN**

Tuan Yang Dipertua,

1. Untuk makluman Ahli Yang Berhormat, dalam hal konsesi pengurusan industri padi dan beras yang baharu, Kerajaan akan memberikan pertimbangan sewajarnya terhadap beberapa perkara seperti berikut:

- i) menilai prestasi Syarikat Padiberas Nasional Berhad (BERNAS) dalam melaksanakan konsesi sebelum ini termasuk penilaian berdasarkan *Key Performance Indicator* (KPI) yang telah dibangunkan;
- ii) mengkaji dari aspek perundangan termasuk perjanjian-perjanjian lain yang masih berjalan dan telah ditandatangani oleh BERNAS dan Kerajaan seperti Perjanjian Pajakan Tanah dengan Pesuruhjaya Tanah Persekutuan (PTP);

iii) mengkaji implikasi kos dan keupayaan Kerajaan memandangkan kos pelaburan tinggi diperlukan dalam menguruskan industri padi dan beras; dan

iv) mengkaji keberkesanan Dasar '*Single Gate Keeper*' bagi memastikan keselamatan makanan ruji negara dan memelihara pengeluaran industri padi dan beras tempatan melalui kawalan kemasukan beras import.

Sekian, terima kasih.

**SIDANG DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN KHOO POAY TIONG [KOTA MELAKA]

TARIKH : 3 OGOS 2020 (ISNIN)

SOALAN

TUAN KHOO POAY TIONG [KOTA MELAKA] minta **MENTERI KOMUNIKASI DAN MULTIMEDIA** menyatakan :

- a) apakah justifikasi, kriteria dan faktor dalam pengagihan spektrum 5G kepada 5 syarikat sepertimana yang diarahkan oleh Menteri pada 15 Mei 2020; dan
- b) mengapakah arahan itu ditarik balik dan dibatalkan pada 3 Jun 2020.

JAWAPAN

Tuan Yang Dipertua,

1. Untuk makluman Ahli Yang Berhormat, pelaksanaan pengagihan spektrum di negara ini adalah tertakluk kepada rangka kerja yang diperuntukkan di bawah Akta Komunikasi dan Multimedia 1998 (Akta 588) dan perundangan subsidiari yang relevan termasuklah Peraturan-Peraturan Komunikasi dan Multimedia (Spektrum) 2000.
2. Spektrum adalah sumber negara yang terhad dan oleh itu, pengagihan spektrum perlu dibuat dengan cekap bagi memastikan penggunaan sumber tersebut dibuat dengan optimum dan mendatangkan hasil yang paling menguntungkan kepada Negara dan

manfaatnya akan dapat dinikmati oleh rakyat melalui perkhidmatan yang lebih berkualiti. Sekiranya pengagihan dibuat tanpa kajian yang menyeluruh, dikhuatiri berlaku pembaziran sumber yang seterusnya memberi kesan kepada hasil Negara.

3. Pelaksanaan pengagihan jalur spektrum untuk perkhidmatan jalur lebar serta perkhidmatan 5G sedang dikaji semula dengan mengambil kira pengagihan spektrum sedia ada yang melibatkan sektor telekomunikasi negara. Ini adalah penting untuk memastikan perkhidmatan jalur lebar sedia ada kepada rakyat dapat dipertingkatkan di samping menaik taraf perkhidmatan yang telah disediakan dengan menggunakan rangkaian teknologi terkini.

4. Sepertimana YB sedia maklum, melalui Projek Demonstrasi 5G Malaysia yang telah dilancarkan sejak Oktober 2019, sejumlah 72 kes-kes kegunaan 5G telah dibangunkan dan didemonstrasikan di 56 tapak (live site) merentasi 6 buah negeri iaitu Kedah, Perak, Pulau Pinang, Selangor, Terengganu dan Wilayah Persekutuan Kuala Lumpur.

5. Projek ini memberi tumpuan kepada sembilan (9) bidang industri yang dikenal pasti iaitu bandar pintar, hiburan/media, minyak dan gas, pelancongan, pembuatan dan pemprosesan, pendidikan, pengangkutan pintar, kesihatan digital dan pertanian. Projek ini turut mendapat sokongan dan komitmen padu daripada penggiat industri telekomunikasi dan multimedia dengan sumbangan pelaburan dianggarkan sebanyak RM143 juta. Inisiatif ini juga dilihat sebagai usaha untuk memperkenalkan teknologi 5G kepada masyarakat melalui kes-kes kegunaan yang didemonstrasikan bagi memberi kesedaran serta pengalaman bagaimana teknologi 5G ini dapat dimanfaatkan.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN HANNAH YEOH TSEOW SUAN
[SEGAMBUT]**

TARIKH : 03 OGOS 2020 (ISNIN)

SOALAN

Puan Hannah Yeoh Tseow Suan [Segambut] minta **MENTERI PEMBANGUNAN WANITA, KELUARGA DAN MASYARAKAT** menyatakan butiran bantuan bakul makanan JKM semasa Perintah Kawalan Pergerakan (PKP) termasuk mekanisme pelantikan pembekal, amaun kontrak, senarai barangan dan sebab bakul makanan yang dijanjikan tidak sampai kepada Ahli Parlimen kawasan pembangkang serta senarai penyelaras yang telah mengedarkan bakul makanan.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) amat prihatin dengan golongan sasaran yang telah terkesan akibat wabak COVID-19 yang telah melanda seluruh negara baru-baru ini.

Mesyuarat Khas Menteri-Menteri Bilangan 8 Tahun 2020 mengenai pelaksanaan Perintah Kawalan Pergerakan (PKP) bertarikh 26 Mac 2020 memutuskan JKM bertanggungjawab memberi bantuan bekalan makanan kepada rakyat Malaysia yang hilang pendapatan dan memerlukan bantuan dalam tempoh pelaksanaan PKP.

Jabatan Kebajikan Masyarakat (JKM) juga telah diberi tanggungjawab untuk menyelaraskan sumbangan makanan termasuk sumbangan daripada Pertubuhan Bukan Kerajaan (NGO)/ Badan Korporat/ Syarikat Swasta dan Individu sepanjang PKP dengan kerjasama pemimpin tempatan, Jabatan Sukarelawan Malaysia (RELA) dan Angkatan Pertahanan Awam Malaysia (APM). Semua pihak, termasuk pemimpin masyarakat boleh mengemukakan aduan dan rujukan sekiranya dikenal pasti ada pihak memerlukan bantuan kepada JKM yang berhampiran untuk disampaikan bantuan tersebut.

Sebanyak RM47.42 juta telah diperuntukkan bagi menampung program bantuan bekalan makanan semasa PKP iaitu Bantuan Bakul Makanan Fasa I - RM5.68 juta, Fasa II - RM9.06 juta, Fasa III - RM10.48 juta melalui peruntukan Tabung COVID-19. Manakala RM22.2 juta peruntukan daripada Kementerian Kewangan bagi menampung Bakul Makanan B40 Kawasan Parlimen. Tempoh masa bagi program bakul makanan mengikut Fasa adalah seperti berikut:

BIL.	PERINGKAT AGIHAN	TEMPOH MASA
1.	Bantuan Bakul Makanan (Tabung COVID-19) Fasa I	26 Mac – 4 Mei 2020
2.	Bantuan Bakul Makanan B40 Kawasan Parlimen	26 Mac – 4 Mei 2020
3.	Bantuan Bakul Makanan (Tabung COVID-19) Fasa II	5 Mei – 31 Mei 2020
4.	Bantuan Bakul Makanan (Tabung COVID-19) Fasa III	Bermula 1 Jun 2020

Bagi membendung krisis panik keperluan makanan semasa PKP, KPWKM telah mengambil inisiatif membuat permohonan tambahan bagi menampung keperluan bakul makanan agar lebih ramai dapat menerima manfaat bantuan ini. Kementerian Kewangan (MOF) telah meluluskan peruntukan bantuan khas bakul makanan kepada kumpulan B40 dengan peruntukkan sebanyak RM22.2 juta.

Bakul makanan ini adalah bagi setiap Ketua Isi Rumah di kawasan sesuatu Parlimen dan bukan khas kepada YB Ahli Parlimen. Jumlah bantuan bakul makanan yang diperuntukkan bagi setiap Kawasan Parlimen adalah sebanyak 1,000 bakul makanan dengan kadar RM100.00.

Selain daripada peruntukan 1,000 bakul tersebut, terdapat juga sumbangan-sumbangan keperluan asas dan bekalan makanan daripada NGO/ Badan Korporat/ Syarikat Swasta dan Individu juga menyumbang dalam pemberian bakul makanan semasa PKP. Oleh yang demikian terdapat pelbagai bentuk dan nilai bakul makanan yang diagihkan kepada penduduk yang layak semasa PKP.

Keseluruhan penerima bantuan Bakul Makanan di seluruh negara adalah seramai 846,374 Ketua Isi Rumah (KIR) dan memberi manfaat kepada 3.0 juta Ahli Isi Rumah (AIR).

Kaedah perolehan bagi bantuan bekalan makanan ini adalah menggunakan Perolehan Darurat (AP173.2) iaitu merupakan proses perbelanjaan dalam keadaan darurat tanpa perlu melalui prosedur perolehan biasa. Pemilihan dan kelulusan pelantikan pembekal dibuat melalui Jawatankuasa Khas yang dibentuk oleh Kementerian dengan mengambil kira kemampuan untuk membekalkan barangan dalam skala besar serta menawarkan harga yang berpatutan dan berdasarkan lokality sesuatu kawasan.

Senarai item di dalam bakul makanan adalah terdiri daripada barangan keperluan asas yang di antaranya ialah beras, minyak masak, gula, tepung gandum dan lain-lain. Senarai item juga berdasarkan keperluan setempat dengan kadar yang telah ditetapkan iaitu RM100.00.

Kementerian mengucapkan setinggi penghargaan kepada semua pegawai dan kakitangan JKM serta YKN, Rakan Agensi yang membantu pengagihan Bakul Makanan iaitu APM dan RELA yang bertungkus lumus memastikan 846,374 Ketua Isi Rumah menerima bakul makanan yang diedarkan.

Tidak ketinggalan juga, barisan para penyumbang yang terdiri daripada NGO/ Badan Korporat/ Syarikat Swasta dan Individu serta pemimpin masyarakat yang banyak membantu kementerian mengenal pasti mereka yang layak menerima bakul makanan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN MUHAMMAD BAKHTIAR BIN WAN
CHIK [BALIK PULAU]**

TARIKH : 03 OGOS 2020 (ISNIN)

SOALAN

Minta **MENTERI PENDIDIKAN** menyatakan status bagi program Sarapan Percuma (PSP) 2020 untuk Sekolah Rendah bagi sesi 2020 ini memandangkan sepanjang Tempoh Perintah Kawalan Pergerakan (PKP), PKPB dan PKPP tiada sesi persekolahan dijalankan. Nyatakan langkah pihak Kementerian yang telah diambil dalam membantu pelajar-pelajar di luar bandar sepanjang tempoh PKP kerana dimaklumkan bahawa tugas sekolah anak-anak ini diberi melalui digital (whatsapp, telegram) dan perlu menggunakan internet. Bagaimana dengan nasib anak-anak yang tiada kemudahan peranti mudah alih serta kemudahan internet sehingga menyebabkan mereka keciciran berbanding rakan-rakan mereka di bandar.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) tidak akan meneruskan Program Sarapan Pagi. Perkara ini telah diputuskan oleh kerajaan pada Januari 2020 dengan mengambil kira implikasi kos pelaksanaan dan kelestarian program. Jemaah Menteri juga memutuskan supaya program rancangan makanan sedia ada untuk murid sekolah rendah, iaitu Program Rancangan Makanan Tambahan (RMT) diteruskan dengan beberapa penambahbaikan.

Sehubungan itu, KPM telah melaksanakan Penambahbaikan Program Rancangan Makanan Tambahan (PPRMT) di 100 buah sekolah terpilih seluruh negara bermula pada 20 Januari 2020. Dalam masa yang sama KPM juga masih meneruskan Program RMT sedia ada di semua sekolah rendah KPM. Sepanjang tempoh Perintah Kawalan Pergerakan (PKP), program PPRMT dan RMT ditangguhkan kerana semua sekolah rendah tidak beroperasi. Namun, apabila sekolah rendah dibuka semula mulai 15 Julai 2020, program PPRMT dan RMT diteruskan semula seperti biasa.

Untuk makluman Ahli Yang Berhormat, KPM komited untuk memastikan semua murid tidak ketinggalan dan dapat mengikuti pembelajaran secara berterusan dalam keadaan selamat sepanjang tempoh PKP. KPM berusaha menyediakan akses pembelajaran kepada murid melalui kaedah *Home-based Learning* mengikut kesesuaian guru dan murid.

KPM sentiasa berusaha untuk memastikan semua murid mendapat akses pembelajaran secara seragam, termasuk juga murid di kawasan luar bandar dan pedalaman. Bagi membantu kumpulan murid yang tidak mempunyai akses kepada talian internet dan alat peranti yang sesuai untuk pembelajaran secara dalam talian, *Home-based Learning* turut dilaksanakan melalui siaran TV Pendidikan. Siaran dilaksanakan melalui saluran TV Okey dan saluran Tutor TV Astro di saluran 601 dan 603. Selain daripada itu, pek pembelajaran dipos, dihantar oleh guru atau diambil oleh ibu bapa di sekolah.

Selain itu, bagi murid yang tinggal di kawasan luar bandar dan pedalaman khususnya, guru melaksanakan PdP melalui serahan bahan pembelajaran kepada murid. Serahan bahan ini dibuat melalui pelbagai kaedah seperti perkhidmatan pos, bantuan penghantaran oleh Persatuan Ibu Bapa Guru (PIBG) dan kaunter pandu lalu di sekolah.

Segala usaha yang dilaksanakan ini jelas menunjukkan bahawa pihak sekolah serta guru begitu komited dan telah berusaha bersungguh-sungguh dalam melaksanakan tanggungjawab untuk memastikan murid tidak ketinggalan atau tercicir dalam mengikuti pembelajaran yang sewajarnya. KPM ingin merakamkan penghargaan kepada semua guru atas segala usaha yang telah dilaksanakan bagi memastikan pengajaran dan pembelajaran diteruskan walaupun dalam keadaan yang mencabar. Selain itu, KPM juga turut menghargai peranan ibu bapa dalam memastikan pengajaran dan pembelajaran di rumah berjalan dengan baik.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

**DARIPADA : Y.B. DATO' DR. XAVIER JAYAKUMAR
A/L ARULANANDRAM [KUALA LANGAT]**

TARIKH : 3 OGOS 2020 (ISNIN)

SOALAN

DATO' DR. XAVIER JAYAKUMAR A/L ARULANANDRAM [KUALA LANGAT] minta **MENTERI KEWANGAN** menyatakan kos keseluruhan LRT3 serta status pembinaan kini, masa projek dijangka siap dan anggaran pelanggan yang akan menggunakan perkhidmatan ini.

JAWAPAN

Tuan Yang di-Pertua,

Projek LRT3 diteruskan berdasarkan model Kontrak Harga Tetap (*“Fixed Price Contract”*) dengan kos keseluruhan sebanyak RM16.63 bilion berbanding kos asal sebanyak RM31.65 bilion melalui model “Project Delivery Partner” (PDP). Perjanjian kontrak berdasarkan model baharu ini telah ditandatangani pada 25 Januari 2019.

Projek LRT3 adalah sepanjang 37.6 km (termasuk 2.2 km bawah tanah) melibatkan laluan dari Bandar Utama ke Johan Setia, Klang. Sebanyak 20 stesen akan dibina manakala 5 buah stesen *provisional* telah dirancang dalam projek ini untuk dibina pada masa akan datang. Sehingga bulan Jun 2020, kemajuan projek adalah sebanyak 33%. Berdasarkan prestasi semasa, Kerajaan yakin bahawa projek ini mampu disiapkan pada bulan Februari 2024.

Tuan Yang di-Pertua,

Projek LRT3 memberi manfaat besar kepada rakyat melibatkan populasi melebihi 2 juta penduduk di sepanjang jajaran, terutama di Koridor Barat Lembah Klang. Daripada segi permintaan, dianggarkan seramai 67,000 penumpang akan menggunakan perkhidmatan LRT3 ini apabila ia dibuka kelak pada Februari 2024. Permintaan ini dijangka akan terus meningkat kepada 126,000 penumpang pada tahun 2030 dan 219,000 penumpang pada tahun 2040.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN SYED IBRAHIM BIN SYED NOH [LEDANG]

TARIKH : 3 OGOS 2020 (ISNIN)

SOALAN

TUAN SYED IBRAHIM BIN SYED NOH [LEDANG] minta **MENTERI KOMUNIKASI DAN MULTIMEDIA** menyatakan langkah dan inisiatif Kementerian dalam memastikan rakyat berhak mendapat maklumat dan berita yang tidak berat sebelah dengan kebebasan media.

JAWAPAN

Tuan Yang di-Pertua,

1. Untuk makluman Ahli Yang berhormat, Kementerian Komunikasi dan Multimedia Malaysia (KKMM) mengamalkan kebebasan kepada mana-mana agensi berita yang berdaftar di dalam membuat pelaporan berita. Namun begitu, pelaporan yang tidak berunsurkan kepada kebenaran membuatkan negara kini terdedah kepada kecaman yang tidak berasas.
2. Bidang kuasa Kementerian ini melalui Suruhanjaya Komunikasi dan Multimedia Malaysia (SKMM) merangkumi media yang dimiliki oleh pemegang lesen di bawah Akta Komunikasi dan Multimedia 1998 (Akta 588).
3. Kod Kandungan Komunikasi dan Multimedia Malaysia (Kod Kandungan) turut menggariskan garis panduan dan tatacara bagi amalan dan piawai kandungan yang baik secara kawalan sendiri atau *self regulation* oleh pemberi-pemberi perkhidmatan industri komunikasi dan multimedia di Malaysia.
4. Peruntukan Kod Kandungan antara lain menghendaki para pemegang lesen untuk tidak menyiarkan kandungan yang boleh menyentuh sensitiviti dan sentimen mana-mana kaum atau agama di negara ini, tidak menyiarkan kandungan yang mengandungi nilai-nilai moral dan budaya yang bertentangan dengan aspirasi kebangsaan negara.
5. Penyiar juga bertanggungjawab terhadap kebolehterimaan bahan-bahan yang disiarkan dan harus memastikan bahawa semua kandungan yang disiarkan mempunyai unsur yang baik dan mematuhi segala undang-undang dan peraturan yang diterima pakai, serta pelaporan kandungan tersebut perlu dibuat secara tepat, seimbang dan objektif, dengan memberi pertimbangan utama kepada keadilan dan keutuhan dalam mengawal isi kandungan.

6. BERNAMA sebagai sebuah agensi yang bertanggungjawab untuk menyebarkan luas maklumat berkaitan dasar-dasar kerajaan berdasarkan Seksyen 6 Akta BERNAMA menyatakan:

“Untuk mencari dan mengemukakan berita atau bahan yang lengkap, objektif dan saksama mengenai apa-apa perkara kepentingan awam dan negara di dalam dan luar Malaysia.”

7. Justeru, dengan adanya akta ini, BERNAMA menjamin rakyat mendapat berita yang tidak berat sebelah, objektif dan saksama.

8. Manakala, Jabatan Penyiaran Malaysia (RTM) mengamalkan konsep liputan berdasarkan nilai sesuatu berita dan kepentingan isu yang hendak dilaporkan daripada sudut pandangan rakyat. Langkah dan inisiatif yang diambil oleh RTM termasuk menyiarkan sesuatu isu atau berita melalui Radio, TV dan media sosial agar rakyat memperoleh maklumat terkini melalui semua media siaran RTM.

9. Liputan oleh RTM juga mengutamakan manfaat yang boleh dijana untuk rakyat dan negara selaras dengan Kod Etika Penyiarannya. RTM juga memuatkan pandangan pro dan kontra serta sentiasa mendukung semangat serta kebebasan untuk berkarya dan berkeaktiviti secara bertanggungjawab dan memelihara keharmonian masyarakat serta menghormati Perlembagaan Malaysia. Bagi memastikan maklumat diterima oleh setiap lapisan masyarakat, siaran berita di saluran radio dan TV RTM, dibawakan dalam lapan (8) bahasa iaitu Bahasa Malaysia, Inggeris, Mandarin, Tamil, Iban, Kadazan, Dusun dan Bajau.

10. Manakala Astro menerusi saluran berita Astro Awani sentiasa memastikan kandungan berita yang disiarkan terkini, tepat dan bermanfaat kepada para penontonnya. Sebagai pemegang lesen Penyedia Perkhidmatan Aplikasi Kandungan (CASP) dari SKMM, kesemua kandungan yang disiarkan melalui platform ASTRO mestilah selari dengan keperluan yang digariskan di dalam Kod Kandungan Komunikasi dan Multimedia Malaysia di bawah seliaan Forum Kandungan dan Multimedia Malaysia (CMCF). Astro Awani juga mempunyai prosedur operasi standard (SOP) yang ketat bagi

memastikan kesemua kandungan berita adalah tepat dan tidak bercanggah dengan fakta sebenar.

11. Untuk makluman Yang Berhormat, Bahagian 4 Kod Kandungan di bawah peruntukan 'Berita dan Hal Ehwal Semasa' menjelaskan bahawa tujuan asas penyebaran berita adalah untuk membolehkan masyarakat mengetahui apa yang berlaku dan untuk memahami perkara yang mungkin memberi kesan kepada mereka selaku anggota masyarakat supaya mereka boleh membuat rumusan dan persepsi mereka sendiri.

12. Intipati peruntukan ini digunapakai dengan jayanya dimana setakat ini, tiada sekatan diberikan oleh mana-mana pihak kepada Astro Awani dalam melaporkan berita kepada penonton. Penonton bebas untuk memilih kandungan berita yang diterbitkan mengikut citarasa dan kehendak masing-masing.

13. Selain dari itu, Jabatan Penerangan Malaysia (JaPen) melaksanakan usaha-usaha progresif dalam menyampaikan maklumat serta menjelaskan isu-isu dengan mengadakan jalinan kerjasama strategik bersama-sama kementerian/ jabatan/ agensi kerajaan/ pihak swasta/NGO dalam pelaksanaan program dan juga perkongsian infografik. Pada masa yang sama, JaPen menggembelng pelaksanaan bersepadu semua fungsi strategiknya iaitu melalui pelaksanaan program penerangan (komunikasi bersemuka), komunikasi visual, komunikasi media *online* dan penerbitan bahan bercetak.

14. Dari Januari 2020 hingga Jun 2020 sebanyak 11,962 aktiviti bersemuka (Program Info On Wheels) dilaksanakan melibatkan seramai 424,670 peserta di 50,166 lokasi. Melalui platform media sosial, sebanyak 10,686 hantaran (posting) turut dimuat naik di media sosial rasmi JaPen. Bagi penerbitan buku kecil/ poster/ risalah pula, sebanyak 22 naskhah telah dicetak dan diedarkan ke seluruh negara. Maklumat juga disampaikan dengan lebih efektif kepada masyarakat melalui 493 visual paparan billboard milik JaPen di lokasi strategik.

15. Skop penerangan juga merangkumi aspek menguar-uarkan inisiatif dan kejayaan kerajaan menerusi strategi *advocacy*, *engagement* dan *outreach* di seluruh negara.

LAMPIRAN A

**SENARAI DAN JUMLAH AKTIVITI YANG DILAKSANAKAN OLEH
JABATAN PENERANGAN MALAYSIA**

BIL.	PERKARA	JUMLAH
1	Info On Wheels (IOW)	Bilangan Program: 11,962 Lokasi: 50,166 Khalayak: 424,670 (data sehingga 16 Mac 2020) (sehingga 30 Jun 2020)
2	Bilangan hantaran (posting) melalui semua platform media sosial rasmi Jabatan Penerangan Malaysia (JaPen) (Facebook, Instagram dan Twitter)	Facebook: 3,444 Twitter: 4,266 Instagram: 2,976 Jumlah Keseluruhan: 10,686 (sehingga 31 Mei 2020)
3	Bilangan Tajuk Penerbitan	d-Book: 20 Buku Mewah: 2 Jumlah Keseluruhan: 22 (sehingga 31 Mei 2020)
4	<i>Billboard</i>	Visual Paparan: 493 (sehingga 31 Mei 2020)

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI RICHARD RIOT ANAK JAEM
[SERIAN]**

TARIKH : 3 OGOS 2020 (ISNIN)

SOALAN

Minta **MENTERI PENDIDIKAN** menyatakan apakah status terkini pelaksanaan projek bina baru bangunan sekolah dan penempatan semula pelajar-pelajar SK St. Theresa, Serian.

JAWAPAN

Tuan Yang di-Pertua,

Untuk makluman Ahli Yang Berhormat, SK St. Teresa di Serian, Sarawak merupakan sekolah bantuan kerajaan dan beroperasi di atas tanah milik Lembaga Pengelola Sekolah (LPS). Bangunan sekolah ini telah diisytihar tidak selamat oleh pihak Jabatan Kerja Raya (JKR) Bahagian Samarahan melalui surat bertarikh 31 Oktober 2005. Pada 21 Oktober 2019, pihak LPS telah memohon agar sekolah tersebut ditutup sepenuhnya bermula sesi persekolahan tahun 2021.

Sehubungan itu, penyuraian semua murid dan guru SK St. Teresa telah dilaksanakan pada 15 hingga 23 Julai 2020. Seramai 53 orang 24 orang guru SK St. Teresa telah disuraikan sepenuhnya ke sekolah-sekolah yang berhampiran bagi memastikan murid terlibat dapat meneruskan pembelajaran dalam keadaan selamat dan selesa. Mengenai pembinaan sekolah atau bangunan baharu SK St. Teresa pula,

KPM tidak pernah menerima sebarang permohonan daripada LPS berkaitan perkara tersebut.

Untuk makluman Ahli Yang Berhormat Serian, berdasarkan perancangan KPM, sebuah sekolah baharu iaitu SK Sri Sadong dengan pembinaan 12 bilik darjah dan kemudahan lain akan dibina di tapak Lot 935, Blok 15 Bukar-Sadong Land District. Projek ini dalam peringkat pra bina dan dokumen tender dijangka akan dimuktamadkan selewat-lewatnya Disember 2020, setelah mendapat kelulusan sepenuhnya daripada Pihak Berkuasa Tempatan (PBT). Pembinaan sekolah baharu ini adalah bagi memenuhi keperluan pendidikan dan pertambahan penduduk di kawasan Serian.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

**DARIPADA : TUAN SIVAKUMAR VARATHARAJU
NAIDU [BATU GAJAH]**

TARIKH : 3 OGOS 2020 (ISNIN)

SOALAN

Minta **MENTERI PENGANGKUTAN** menyatakan tentang cadangan membina eskalator di stesen KTM Batu Gajah. Apakah cadangan untuk menaik taraf dan menambah baik kemudahan-kemudahan lain termasuk sistem parkir yang menimbulkan rasa tidak senang hati di kalangan pelanggan stesen tersebut.

JAWAPAN

Yang Di-Pertua,

Untuk makluman Ahli Yang Berhormat, Kementerian Pengangkutan mengambil maklum akan keperluan untuk menaiktaraf kemudahan yang terdapat di stesen-stesen kereta api. Dalam hal ini, tumpuan utama Kementerian adalah penyediaan kemudahan bagi menampung keperluan golongan Orang Kelainan Upaya (OKU), wanita mengandung dan warga emas. Seperti mana Ahli Yang Berhormat sedia maklum, mereka ini merupakan golongan yang berkeperluan khas, maka langkah yang diambil oleh Kementerian ini adalah selaras dengan matlamat untuk menyediakan sektor pengangkutan yang boleh diakses oleh semua golongan.

Sehubungan tu, pada 2013 kemudahan untuk OKU, wanita mengandung dan warga emas telah diperkenalkan di Stesen Keretapi Kampar dan diikuti Stesen Keretapi Tanjung Malim pada 2019. Bagi Stesen Keretapi Batu Gajah, Perbadanan Aset Keretapi (RAC) iaitu agensi di bawah Kementerian Pengangkutan yang bertanggungjawab atas aset-aset perkeretapian sedang dalam proses penyediaan skop kerja bagi pembinaan lif penumpang yang bukan sahaja akan menampung keperluan golongan berkeperluan khas, malah juga untuk orang awam secara keseluruhannya. Pembinaan lif penumpang ini dilihat bersifat pelbagai guna dan dijangka memberi lebih manfaat berbanding pembinaan escalator, dimana kos pembinaan dan penyelenggaraannya secara berkala adalah jauh lebih tinggi. Skop lain yang terlibat adalah kerja-kerja membaik pulih fasiliti bagi kemudahan OKU sedia ada di stesen berkenaan.

Untuk makluman Ahli Yang Berhormat, RAC telah melantik Syarikat Aman Enterprise untuk mengurus dan mengoperasikan tempat letak kereta di Stesen Keretapi Batu Gajah yang dilengkapi dengan 94 petak parkir. Merujuk kepada Surat Tawaran yang dikeluarkan, operator tersebut diarahkan memulakan tugasnya pada 1 Mei 2020, namun begitu ekor dari Perintah Kawalan Pergerakan (PKP) akibat penularan pandemik Covid-19, pengoperasian syarikat tersebut telah tertangguh.

Sejajar dengan pengumuman pembukaan secara berperingkat kebanyakan sektor lanjutan berakhirnya PKP, pihak operator telah memulakan operasi pada 1 Jun 2020 secara manual iaitu melalui kutipan oleh pekerja yang bertugas. Seterusnya, dalam usaha menyahut seruan Kerajaan yang menggalakkan penggunaan *cashless* di kalangan pengguna pengangkutan awam, pihak operator dalam tindakan untuk memasang peralatan mesin Touch & Go bagi tujuan pembayaran caj parkir. Kutipan parkir secara *cashless* ini dijangka akan mula dilaksanakan sepenuhnya pada Oktober 2020.

Semoga dengan peningkatan dan penambahbaikan fasiliti yang sedang dilaksanakan RAC di stesen-stesen kereta api, ianya akan memberikan keyakinan dan menggalakkan orang ramai untuk meletakkan kenderaan mereka sekaligus meningkatkan penggunaan rel untuk ke destinasi masing-masing.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN PRABAKARAN A/L
M.PARAMESWARAN [BATU]**

TARIKH : 3 OGOS 2020 [ISNIN]

SOALAN

YB TUAN PRABAKARAN A/L M PARAMESWARAN minta **MENTERI TENAGA DAN SUMBER ASLI** menyatakan mengapa berlaku peningkatan drastik terhadap cas penggunaan elektrik sepanjang tempoh PKP dan mengapa tidak dibuka satu ruangan untuk dimuat naik imej bacaan meter elektrik melalui aplikasi myTNB bagi mengatasi masalah “tiada pekerja dibenarkan bekerja di lapangan” sepanjang tempoh penguatkuasaan PKP.

JAWAPAN

Tuan Yang di-Pertua,

1. Punca berlakunya peningkatan bil elektrik semasa tempoh Perintah Kawalan Pergerakan (PKP) bagi pengguna domestik adalah antara lainnya, disebabkan faktor-faktor berikut:

- (i) penggunaan elektrik di kalangan pengguna domestik sepanjang tempoh PKP telah meningkat di antara 20 hingga 50%. Keadaan ini berlaku kerana rakyat telah mematuhi perintah Kerajaan untuk berada di rumah masing-masing dan tidak keluar rumah sepanjang tempoh PKP kecuali pekerja-pekerja dalam sektor-sektor yang menyediakan perkhidmatan penting kepada rakyat;

(ii) operasi bacaan meter elektrik secara fizikal telah dihentikan sepanjang tempoh PKP iaitu bagi tempoh 20 Mac 2020 sehingga 18 Mei 2020. Bacaan bil dibuat secara anggaran bagi tempoh Mac, April dan Mei 2020 yang menyebabkan bil elektrik bulan Jun kelihatan tinggi kerana penyelarasan dibuat bagi bil anggaran bulan Mac, April dan Mei di dalam bil bulan Jun. Aktiviti bacaan meter elektrik oleh semua utiliti elektrik di Malaysia telah dihentikan secara sementara bermula 18 Mac 2020 mengikut Prosedur Operasi Standard (SOP) PKP yang ditetapkan oleh Majlis Keselamatan Negara (MKN) demi menjaga kebajikan pembaca meter dan memutuskan rantai serta membendung penularan wabak Covid-19. Langkah yang sama juga telah diambil oleh pihak utiliti lain di rantau ini seperti Singapura, Filipina, Thailand dan Indonesia; dan

2. Berhubung cadangan Ahli Yang Berhormat, sebenarnya pihak TNB telah menawarkan perkhidmatan Self Meter Reading (SMR) kepada pengguna domestik sejak Oktober 2015. Melalui skim ini, pengguna hanya perlu menghantar imej bacaan meter melalui aplikasi myTNB atau portal myTNB untuk membolehkan pihak TNB mengeluarkan bil bacaan sebenar. Pada ketika ini, terdapat sekitar 15,000 pengguna yang telah berdaftar di bawah SMR.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS 2020**

PERTANYAAN : LISAN

**DARIPADA : YB. TUAN MUHAMMAD BAKHTIAR
BIN WAN CHIK [BALIK PULAU]**

TARIKH : 3 OGOS 2020 (ISNIN)

SOALAN

YB. TUAN MUHAMMAD BAKHTIAR BIN WAN CHIK [BALIK PULAU] minta **MENTERI PELANCONGAN, SENI DAN BUDAYA** menyatakan apakah rancangan kerajaan untuk memulihkan sektor pelancongan secara terperinci dan berikan bagaimanakah pakej penjana RM1billion dapat membantu sektor pelancongan termasuk pengusaha inap desa “*homestay*” dan para artisan (seperti pengusaha kraf). Serta nyatakan juga apakah strategi Kementerian dalam membangunkan semula pelancongan domestik tanpa bergantung harap kepada kepada pelancong dari negara luar.

JAWAPAN

Tuan Yang di-Pertua,

1. Penularan wabak COVID-19 telah memberi impak negatif yang sangat besar kepada industri pelancongan negara. Kerajaan sedar bahawa pihak dalam industri ini sedang menghadapi kesukaran yang berat pada saat ini. Justeru, Kerajaan melalui Kementerian Pelancongan, Seni dan Budaya (MOTAC) telah merancang pelaksanaan Pelan Pemulihan Pelancongan dan Kebudayaan dalam usaha membantu industri pelancongan dan kebudayaan untuk bangkit semula.

2. Setelah menilai pelbagai faktor, Kerajaan telah bersetuju membenarkan sektor pelancongan domestik untuk beroperasi semula bermula pada 10 Jun 2020. Ini membolehkan penggiat industri pelancongan domestik seperti industri perhotelan, inap desa (homestay), pengusaha kraf dan pemandu pelancong merancakkan semula aktiviti pelancongan yang terhenti sebelum ini.

3. Bagi membantu industri ini untuk bangkit semula, Kerajaan telah menyediakan insentif dan bantuan menerusi Pakej Rangsangan Ekonomi Prihatin Rakyat (PRIHATIN), PRIHATIN PKS TAMBAHAN dan Pelan Jana Semula Ekonomi Negara (PENJANA) yang boleh dimanfaatkan oleh pemain industri pelancongan dan kebudayaan tempatan. Bantuan ini bukan sahaja bagi meneruskan kelangsungan aktiviti sedia ada malah boleh turut digunakan untuk menambahbaik produk industri ini.

4. Selain daripada insentif tersebut, MOTAC sendiri juga telah melaksanakan inisiatif-inisiatif khusus bagi membantu *stakeholders* dalam industri yang terlibat. Antaranya ialah:

- i. menawarkan kursus *Domestic Tourism Vibes* secara dalam talian dengan kerjasama Persatuan Institut-institut Latihan Pelancongan Malaysia (ATTIM) dan *Malaysian Tourist Guide Council* (MTGC);
- ii. pengecualian bayaran fi lesen bagi pengusaha-pengusaha pelancongan dan pemandu pelancong yang layak bermula 17 Mac hingga 31 Disember 2020;
- iii. pemberian diskaun pembayaran kompaun sebanyak 40% kepada semua pengusaha pelancongan dan pemandu pelancong berlesen yang dikenakan kompaun oleh Kementerian sebelum 31 Disember 2020.
- iv. pelanjutan tempoh bayaran kompaun sehingga 31 Disember 2020 bagi semua kompaun yang dikeluarkan kepada syarikat atau pemandu pelancong berlesen;

- v. pengecualian kompaun kepada pengusahaan pelancong dan pemandu pelancong yang gagal memperbaharui lesen dalam tempoh yang ditetapkan disebabkan oleh PKP dengan syarat permohonan lengkap perlu dikemukakan dalam tempoh 60 hari selepas tamat tempoh PKP;
 - vi. menyediakan platform e-Kraf Bazaar yang membolehkan usahawan kraf menjalankan aktiviti promosi dan jualan produk secara *online*. Ini amat membantu khususnya di peringkat awal PKP dilaksanakan dan memberi manfaat kepada lebih 7,000 pengusaha seni dan kraf tempatan; dan
 - vii. pelancaraan aplikasi *Craft On The Go* pada 1 April 2020 bagi menyediakan perkhidmatan secara digital dalam bentuk *mobile apps* kepada masyarakat bagi meningkatkan kebolehcapaian maklumat mengenai usahawan kraf di seluruh Malaysia.
5. Seterusnya, bagi meletakkan Malaysia sebagai destinasi utama pelancongan, MOTAC juga telah merangka Pelan Pemulihan Pelancongan dan Kebudayaan melalui strategi-strategi berikut:
- i. memulihkan kembali keyakinan orang awam untuk kembali melancong melalui Kempen Malaysia Bersih dan Selamat;
 - ii. merancakkan semula pelancongan domestik;
 - iii. meneroka potensi ketibaan pelancong asing dari pasaran jarak dekat seperti negara ASEAN terutamanya melalui pelancongan rentas sempadan atau *cross border tourism* seperti mengadakan gelembung perjalanan atau *travel bubble* dengan negara-negara jiran atau negara-negara zon hijau yang dikenalpasti hasil kerjasama dengan Kementerian Kesihatan, Kementerian Dalam Negeri dan Kementerian Luar Negeri; dan
 - iv. memberi keutamaan kepada segmen yang telah dibenarkan oleh Kerajaan seperti pelancongan kesihatan, taman tema dan MICE. Dalam hal ini, Kementerian juga melalui Malaysia

Convention & Exhibition Bureau (MyCEB) telah melancarkan Kempen “*Meet In Malaysia*” pada 24 Julai 2020 bagi menggalakkan penganjuran MICE secara hibrid iaitu secara fizikal dan dalam talian serentak.

6. Sementara itu, Skim Pembiayaan Sektor Pelancongan PENJANA bernilai RM1 bilion seperti yang telah diumumkan YAB Perdana Menteri kini dibuka untuk permohonan. Pelaksanaan skim ini merupakan inisiatif Kerajaan di bawah Pelan Jana Semula Ekonomi Negara (PENJANA), bagi membantu Perusahaan Kecil dan Sederhana (PKS) serta perusahaan mikro tempatan dalam sektor pelancongan teras dan sektor berkaitan pelancongan memulihkan perniagaan mereka yang terjejas berikutan penularan COVID-19. Butiran terperinci mengenai skim ini boleh didapati melalui laman sesawang PENJANA iaitu <https://penjana.treasury.gov.my/>.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK HAJI HASANUDDIN BIN MOHD YUNUS
[HULU LANGAT]**

TARIKH : 3 OGOS 2020 (ISNIN)

SOALAN

DATUK HAJI HASANUDDIN BIN MOHD YUNUS [HULU LANGAT] minta **MENTERI KOMUNIKASI DAN MULTIMEDIA** menyatakan apakah Kementerian mempunyai **kriteria khusus kelulusan pendidikan** dalam menentukan pemilihan juruhebah radio swasta memandangkan mutu penyampaian segelintir mereka yang tidak membawa kepada pembinaan minda yang positif dan terpelajar.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian ini melalui Suruhanjaya Komunikasi dan Multimedia Malaysia (SKMM) mengawal selia media yang dimiliki oleh pemegang lesen di bawah Akta Komunikasi dan Multimedia 1998 (Akta 588) televisyen serta juga radio.
2. Kod Kandungan Komunikasi dan Multimedia Malaysia (Kod Kandungan) di bawah akta ini turut menetapkan garis panduan dan tatacara bagi amalan dan piawai kandungan yang baik secara kawalan sendiri atau *self regulation* oleh pemberi-pemberi perkhidmatan industri komunikasi dan multimedia di Malaysia.
3. Peruntukan Kod Kandungan antara lain menghendaki para pemegang lesen untuk tidak menyiarkan kandungan yang boleh menyentuh sensitiviti dan sentimen mana-mana kaum atau agama di negara ini, tidak menyiarkan kandungan yang mengandungi nilai-nilai moral dan budaya yang bertentangan dengan aspirasi kebangsaan negara.
4. Penyiar juga bertanggungjawab terhadap kebolehterimaan bahan-bahan yang disiarkan dan harus memastikan bahawa semua kandungan yang disiarkan mempunyai unsur yang baik dan mematuhi segala undang-undang dan peraturan yang diterima pakai, serta pelaporan kandungan tersebut perlu dibuat secara tepat, seimbang dan objektif, dengan memberi pertimbangan utama kepada keadilan dan keutuhan dalam mengawal isi kandungan.
5. Sebagai contoh, Astro Radio Sdn Bhd mempunyai kriteria yang khusus dalam pemilihan juruhebah radio ataupun penyampai radio bagi memastikan kandungan yang disampaikan menarik, terkini, sesuai dengan citarasa pendengar di samping mematuhi kehendak peraturan kandungan.

6. Salah satu kriteria tersebut adalah latar belakang pendidikan mereka. – sekurang-kurangnya memiliki Sijil Pelajaran Malaysia (SPM). Tetapi, ia bukanlah faktor utama pemilihan kerana selain dari kelayakan akademik, kemahiran berkomunikasi dan berinteraksi dengan baik, imej yang baik/positif terutamanya dikalangan orang awam menjadi faktor dalam pemilihan mereka sebagai penyampai radio untuk menarik perhatian pendengar.

7. Penyampai radio tersebut telah didedahkan dengan dengan pematuhan kandungan dimana mereka wajib menyertai latihan pematuhan setiap tahun. Modul latihan tersebut adalah berdasarkan Kod Kandungan Komunikasi dan Multimedia dan mereka juga diingatkan supaya peka terhadap kandungan sensitif yang melibatkan 3Rs (Race, Religion, Royalty). Justeru, mereka sentiasa peka terhadap kandungan yang perlu disampaikan dan mengelak dari kandungan yang bertentangan dengan peraturan.

8. Untuk pengetahuan Yang Amat Behormat, tugas penyampai radio di stesen bukan hanya terbatas pada pengendalian program radio pada waktu penyiaran sahaja, malahan mereka juga terlibat dalam kerja penerbitan belakang tabir. Ini bagi memastikan mereka mempunyai kemahiran dalam melakukan penyelidikan untuk sebuah kandungan, penulisan skrip dan semangat kerjasama dalam memberikan idea kepada pasukan penerbitan. Secara dasarnya, penyampai radio dilatih untuk mengendalikan setiap aspek dalam penerbitan sebuah program radio.

9. Budaya kerja stesen radio adalah pantas dan sentiasa berlaku perubahan yang drastik sejajar dengan perkembangan isu semasa. Oleh sebab itu stesen radio juga menekankan aspek sikap peribadi yang positif bagi mencerminkan imej stesen radio yang berkaitan.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

DARIPADA : TUAN WONG CHEN [SUBANG]

TARIKH : 3 OGOS 2020 (ISNIN)

SOALAN

Minta **MENTERI PENGANGKUTAN** menyatakan :

- (a) Berapa banyak dan kepada siapa wang dibayar di bawah projek ECRL sebelum penangguhannya selepas PRU 14; dan
- (b) Berapa banyak dan kepada siapa wang dibayar setelah ECRL disemak dan dilancarkan semula

JAWAPAN

Yang Di-Pertua,

Untuk makluman Yang Berhormat, pelaksanaan Projek Laluan Rel Pantai Timur (ECRL) telah digantung pada 3 Julai 2018 hingga 12 April 2019. Rundingan semula dengan pihak Kerajaan Republik Rakyat China telah dilaksanakan oleh Kerajaan PH dan diketuai oleh Tun Daim Zainuddin, selaku utusan khas Perdana Menteri.

Malaysia Rail Link Sdn. Bhd. (MRL), sebuah anak syarikat milik penuh Menteri Kewangan Diperbadankan merupakan pemilik projek ECRL. Syarikat China Communications Construction Company Ltd. (CCCC) telah dilantik sebagai kontraktor utama projek ini di mana perjanjian kontrak kejuruteraan, perolehan, pembinaan dan pentauliahan projek ECRL telah dimeterai dengan syarikat CCCC.

Sehingga 3 Julai 2018, MRL telah membuat bayaran sebanyak RM 10.01 bilion kepada CCCC yang terdiri daripada bayaran pendahuluan bagi Fasa 1- (Kota Bharu – ITT Gombak) dan Fasa 2- (Gombak – Pelabuhan Klang), Landasan Berkembar (Double Track) & Sambungan Utara (Kota Bharu – Pengkalan Kubor). Bayaran kemajuan projek sebanyak RM 9.67 bilion yang merangkumi 8 bayaran juga telah dibuat.

Setelah projek ECRL diteruskan semula pada 15 April 2019, MRL telah membuat pembayaran sejumlah RM 698 juta yang merangkumi 7 bayaran kepada CCC menjadikan jumlah keseluruhan bayaran sehingga 13 Julai 2020 sebagai RM 20.37 bilion (anggaran bundaran).

Kesemua bayaran ini adalah bagi kerja-kerja awalan seperti siasatan tanah (*soil investigation*), kerja ukur, rekabentuk, yuran juruperunding dan jurutera pemeriksa bebas (*independent checking engineer*). Selain itu, bayaran bagi kerja-kerja sivil juga telah dibuat seperti kerja-kerja terowong, pembersihan tanah (*site clearance*) dan penambahbaikan tanah (*soil improvement*).

Untuk makluman juga, Kerajaan sedang dalam proses untuk memuktamadkan laluan bagi Seksyen C (jajaran Mentakab - Pelabuhan Klang), dan stesen di sepanjang jajaran ini. Proses ini perlu dijalankan untuk Kerajaan mengambilkira beberapa faktor penting seperti viabiliti projek, kesaling-hubungan rel dan implikasi kewangan sebelum kelulusan diberikan bagi jajaran ini. Kesemua bayaran yang telah dibuat akan diambil kira dalam kos siling yang akan ditentukan oleh Kerajaan selepas jajaran projek ECRL dimuktamadkan dan tertakluk kepada pengesahan dalam akaun akhir (*final account*).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

**DARIPADA : Y.B. TUAN SIVAKUMAR A/L
VARATHARAJU NAIDU [BATU GAJAH]**

TARIKH : 3 OGOS 2020 (ISNIN)

SOALAN

TUAN SIVAKUMAR A/L VARATHARAJU NAIDU [BATU GAJAH] minta **MENTERI KEWANGAN** menyatakan tentang status bebas cukai Pulau Pangkor. Apakah rancangan masa hadapan. Adakah status bebas cukai Pulau Pangkor diselaraskan dengan Pulau Langkawi dari segi harga dan jenis barangan yang disenaraikan.

JAWAPAN

Tuan Yang di-Pertua,

Untuk makluman Ahli Yang Berhormat, Pulau Pangkor telah diwartakan sebagai Pulau Bebas Cukai berkuatkuasa mulai 1 Januari 2020. Pewartaan Pulau Bebas Cukai Pangkor meliputi Pulau Pangkor dan pulau-pulau kecil yang lain di sekelilingnya kecuali Pangkor Laut dan Pulau Marina.

Pengisytiharan Pulau Bebas Cukai Pangkor adalah sebagai salah satu usaha Kerajaan untuk menggalakkan lagi industri perdagangan dan pelancongan di Negeri Perak. Ia juga bagi menyokong hasrat Kerajaan Negeri Perak yang komited untuk terus memacu sektor pelancongan sebagai salah satu jentera utama pertumbuhan sektor perkhidmatan negeri dan meningkatkan penglibatan lebih ramai rakyat tempatan dalam aktiviti pelancongan.

Mengenai rancangan masa depan Pulau Pangkor, *Northern Corridor Implementation Authority* (NCIA), selaku Pihak Berkuasa Pembangunan Wilayah Utara (NCER), turut membantu Kerajaan Negeri Perak dalam menetapkan hala tuju dan menyusun strategi berkaitan pembangunan sosioekonomi di wilayah NCER melalui Pelan Pelaksanaan Strategik Pulau Pangkor. Pelan ini telah menyenaraikan cadangan projek yang boleh dilaksanakan untuk membangunkan Pulau Pangkor sebagai Pulau Bebas Cukai dalam tiga sektor utama, iaitu pembangunan infrastruktur, pembangunan pelancongan dan pembangunan modal insan.

Projek pembangunan infrastruktur yang dijadikan keutamaan dalam Pelan berkenaan adalah pembangunan Kompleks Jeti Penumpang Pulau Pangkor, pembesaran Jeti Kargo di Sungai Pinang Besar dan pembangunan kompleks kedai barangan bebas cukai di Pasir Bogak dan Teluk Dalam. Bagi sektor pelancongan pula, pihak NCIA telah menyenaraikan beberapa projek seperti pembangunan pusat konservasi penyu di Teluk Ketapang, *Pangkor Zipline Flyer* dan pembangunan fasiliti pelancongan di Teluk Nipah sebagai *Sunset*

Beachfront. Manakala bagi pembangunan modal insan pula, pihak NCIA menyenaraikan beberapa program latihan kemahiran yang melibatkan pemandu teksi, golongan belia dan usahawan di Pulau Pangkor.

Dari segi status bebas cukai, semua barangan yang diimport ke Pulau Pangkor adalah bebas cukai kecuali produk petroleum dan kenderaan bermotor yang tertakluk kepada duti / cukai, sepertimana status Pulau Bebas Cukai Tioman. Berbanding dengan Pulau Bebas Cukai Langkawi, kemudahan bebas cukai boleh dinikmati ke atas semua barangan kecuali produk petroleum, simen, marmar, getah dan ikan bilis. Pengenaan duti / cukai ini adalah bertujuan melindungi perusahaan tempatan yang menghasilkan produk simen, marmar, getah dan ikan bilis di Langkawi.

Sungguhpun begitu, layanan bebas cukai bagi pelancong adalah selaras di semua Pulau Bebas Cukai Langkawi, Labuan, Tioman dan Pangkor. Pelawat tempatan dan pelancong asing yang pulang dari Pulau Bebas Cukai setelah berada di pulau berkenaan tidak kurang dari 48 jam adalah layak untuk menikmati pengecualian duti import ke atas barangan tertentu yang tersenarai di bawah Perintah Dutu Kastam (Pengecualian) (Pindaan) (No. 4) 2019 tertakluk kepada had barangan yang ditetapkan.

Dari segi pelarasan harga barangan di antara Pulau Bebas Cukai, walaupun diberi layanan bebas cukai namun Kerajaan tidak mengawal harga jualan barangan bebas cukai di semua Pulau tersebut. Harga jualan barangan bebas cukai boleh dipengaruhi oleh pelbagai faktor seperti kos pengeluaran, pengiklanan, pengangkutan dan pengedaran serta faktor lain termasuk permintaan dan penawaran barangan di pasaran. Secara prinsipnya, status bebas cukai akan menjadikan harga barangan bebas cukai di semua Pulau Bebas Cukai lebih berdaya saing berbanding produk sama yang dijual di Kawasan Utama Kastam yang dikenakan duti / cukai.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' SERI DR. WAN AZIZAH WAN
ISMAIL [PANDAN]**

TARIKH : 03 OGOS 2020 (ISNIN)

SOALAN

Dato' Seri Dr. Wan Azizah Wan Ismail [Pandan] minta **MENTERI PEMBANGUNAN WANITA, KELUARGA DAN MASYARAKAT** menyatakan pendirian Kementerian berhubung program i-Suri yang dilancarkan pada Ogos 2019, dan bilakah fasa kedua – sumbangan Kerajaan RM10 sebulan melalui caruman PERKESO kepada yang layak – dan fasa ketiga – sumbangan sukarela suami sebanyak 2% gaji ke akaun KWSP isteri – akan dilancarkan.

JAWAPAN

Tuan Yang di-Pertua,

Program i-Suri Fasa 1 telah dilancarkan pada 8 Ogos 2018 dan mula berkuat kuasa serta dibuka untuk pendaftaran pada 15 Ogos 2018. Sehingga Disember 2019, sejumlah RM58,102,200 insentif daripada Kerajaan telah disalurkan kepada 125,658 pencarum KWSP di bawah program ini. Jumlah kumpulan sasar yang layak memohon i-Suri adalah seramai 331,365 orang iaitu wanita yang merupakan Ketua Isi Rumah (KIR) dan isteri kepada KIR yang berdaftar dengan eKasih sehingga 30 November 2019. Kementerian ini berpandangan program ini wajar diteruskan bagi memberikan jaringan sosial asas bagi kumpulan masyarakat yang tidak dilindungi terutamanya suri rumah sekiranya berlaku perubahan mengejut dalam rumah tangga seperti kematian

suami, perceraian, keilatan, hilang upaya dan lain-lain. Konsep kebajikan yang diterapkan kepada masyarakat adalah kebajikan produktif di mana Kerajaan dan masyarakat bersama-sama berusaha ke arah kesejahteraan masa depan masing-masing.

Bagi pelaksanaan Fasa Kedua yang melibatkan sumbangan Kerajaan RM10 sebulan melalui caruman Pertubuhan Keselamatan Sosial (PERKESO) kepada yang layak, cadangan tersebut pada sebelum ini hendak direalisasikan menerusi pewujudan Skim Keselamatan Sosial Suri Rumah (SKSSR) yang akan ditadbir urus oleh PERKESO. Namun begitu, buat masa ini, pembangunan mekanisme SKSSR sedang diperhalusi oleh Kerajaan melalui pendekatan perundangan. Perincian mekanisme pelaksanaan sedang diperhalusi bagi membolehkan pelaksanaan skim ini dapat dilaksanakan dengan sebaiknya.

Rang Undang-Undang Kumpulan Wang Simpanan Pekerjaan (Pindaan) 2019 telah diluluskan oleh Parlimen pada 18 Disember 2019 dan telah diwartakan pada 31 Disember 2019. Pindaan tersebut antara lain memperuntukkan kadar caruman yang akan dipindahkan iaitu sebanyak 2% daripada caruman ahli KWSP yang memilih untuk memindahkan carumannya kepada isteri atau isteri-isterinya. Pelaksanaan program i-Suri Fasa 3 yang melibatkan permohonan pindahan secara sukarela ini dilaksanakan sebagaimana perancangan asal iaitu pada Oktober 2020. Dijangkakan suami yang ingin menyertai skim ini boleh membuat permohonan di kaunter KWSP mulai 1 Oktober 2020.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN JUGAH ANAK MUYANG @ TAMBAT
[LUBOK ANTU]**

TARIKH : 3 OGOS 2020 (ISNIN)

SOALAN

Minta **MENTERI PENDIDIKAN** menyatakan :-

- (a) jumlah pemohon dari kaum Dayak yang berjaya memasuki Institut Pendidikan Guru (IPG) di Sarawak pada tahun ini; dan
- (b) bagaimanakah merit justifikasi yang didasarkan dalam pemilihan guru pelatih.

JAWAPAN

Tuan Yang di-Pertua,

Untuk makluman Ahli Yang Berhormat, jumlah pengambilan pelajar lepasan Sijil Pelajaran Malaysia untuk Program Ijazah Sarjana Muda Perguruan (PISMP) di Institut Pendidikan Guru (IPG) setiap tahun adalah berdasarkan unjuran keperluan guru sekolah rendah di seluruh negara. Bagi tahun 2020, jumlah penawaran pelajar PISMP di semua kampus IPG seluruh negara adalah seramai 5,156 orang. Daripada jumlah tersebut, 191 orang adalah daripada kaum Dayak. Khusus bagi kampus IPG di Sarawak, 64 tawaran telah dibuat kepada kaum Dayak.

Proses pengambilan guru PISMP KPM adalah berdasarkan kepada empat (4) komponen saringan iaitu akademik, kokurikulum, Ujian

Kelayakan Calon Guru (UKCG) dan temu duga semuka. Calon guru IPG dipilih dalam kalangan pelajar cemerlang lepasan Sijil Pelajaran Malaysia (SPM) yang memperoleh minimum gred cemerlang dalam lima (5) mata pelajaran dan ke atas. Seterusnya, semua calon yang memenuhi kelayakan akademik mengikut opsyen mata pelajaran perlu lulus UKCG sebelum dipanggil temu duga.

Namun, bagi tahun 2020, komponen temu duga semuka tidak dapat dilaksanakan kerana tempoh sesi temuduga calon yang dijadualkan adalah dalam tempoh PKP. Sehubungan itu, calon diminta menghasilkan video simulasi pengajaran (*Mock Teaching*) bagi menggantikan temu duga semuka.

Secara keseluruhan, calon akan dipilih berdasarkan merit markah yang diperoleh meliputi akademik, kokurikulum dan penilaian video. Tiada kuota mengikut etnik atau kaum ditetapkan dalam pengambilan pelajar IPG.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 3 OGOS 2020 (ISNIN)

SOALAN

Minta **MENTERI PENDIDIKAN** menyatakan apakah status bantuan bayaran utiliti tambahan yang juga merangkumi pembentungan sebanyak RM12 juta kepada sekolah bantuan Kerajaan.

JAWAPAN

Tuan Yang di-Pertua,

Bagi tahun 2020, peruntukan kepada Sekolah Bantuan Kerajaan (SBK) bagi membiayai bil utiliti adalah sebanyak RM32 juta, di mana RM12 juta daripada jumlah ini adalah bagi membiayai bil pembetulan. Pada bulan Januari 2020, sebanyak RM16.8 juta telah disalurkan kepada semua Jabatan Pendidikan Negeri dan baki peruntukan akan disalurkan berdasarkan kepada permohonan.

Pembayaran bil ini melibatkan sebanyak 1,207 buah SBK. Pembayaran bil dibuat oleh Pejabat Pendidikan Daerah atau sekolah berdasarkan bil sebenar, termasuk juga bil pembetulan yang dikemukakan oleh SBK. Had maksimum bayaran bil sebulan bagi setiap sekolah adalah RM5,000.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 3 OGOS 2020 (ISNIN)

SOALAN

Minta **MENTERI PENGAJIAN TINGGI** menyatakan status terkini pencapaian Jawatankuasa Kabinet Pemerkasaan TVET dan adakah Kementerian ini akan diberi kepercayaan menerajui usaha bersepadu rentas Kementerian.

JAWAPAN

Tuan Yang di-Pertua,

Jawatankuasa Kabinet Pemerkasaan Pendidikan dan Latihan Teknikal dan Vokasional Malaysia (JKKPTVET) telah ditubuhkan pada 14 Ogos 2019. JKKPTVET berperanan sebagai badan penasihat di peringkat nasional kepada kerajaan dalam usaha memperkasa sistem dan Institusi TVET secara menyeluruh merentas Kementerian. Berdasarkan perkembangan dan keperluan semasa, pihak kementerian sedang meneliti untuk memperkukuhkan tadbir urus dan halatuju pendidikan latihan teknikal dan vokasional secara keseluruhannya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : DR. MASZLEE BIN MALIK
[SIMPANG RENGAM]
TARIKH : 3 OGOS 2020 (ISNIN)

SOALAN

Minta **MENTERI PENDIDIKAN** menyatakan apakah langkah-langkah dan usaha yang pihak Kementerian Pendidikan telah dan bakal laksanakan dalam menjayakan agenda pemerkasaan ekonomi Bumiputera dalam sektor pendidikan khususnya dalam konteks Wawasan Kemakmuran Bersama yang diperkenalkan oleh Kerajaan sebelum ini.

JAWAPAN

Tuan Yang di-Pertua,

Wawasan Kemakmuran Bersama 2030 (WKB2030) memberi penekanan kepada tiga objektif utama, iaitu pembangunan untuk semua, menangani jurang kekayaan dan pendapatan serta negara bersatu, makmur dan bermaruah. Kementerian Pendidikan Malaysia (KPM) terus komited dalam menjayakan agenda WKB2030, termasuk agenda pemerkasaan ekonomi melalui pendidikan.

Untuk makluman Ahli Yang Berhormat, pada tahun 2019 KPM telah melaksanakan beberapa program pemerkasaan modal insan kepada kumpulan sasar sejajar dengan matlamat WKB2030. KPM telah melaksanakan beberapa program utama, termasuk enam program transformasi minda anak muda, 16 program sekolahku ceria, 10 program peduli pendidikan, tiga program sokongan pendidikan dan 6 program

pemeriksaan pembangunan modal insan. Program yang dilaksanakan ini melibatkan murid dari prasekolah hinggalah lepasan menengah termasuk kumpulan belia tamat dalam pendidikan yang memberi tumpuan untuk mencari pekerjaan. Antara program yang telah diadakan adalah seperti yang berikut:

- a) Program peningkatan akademik anak-anak nelayan Persisir Pantai. Program rintis bermula tahun 2019, dilaksanakan di daerah persisir pantai Kelantan iaitu Bachok, Tumpat, Kota Bharu dan Pasir Puteh;
- b) Pensijilan Profesional Kemahiran bagi Peningkatan Profesionalisme Pelajar B40 Kolej Vokasional Malaysia, KPM;
- c) Program Pemerksaan Modal Insan Golongan Murid Orang Kurang Upaya (OKU) Ke Arah Industri Revolusi (IR4.0) Berasaskan Kemahiran Teknologi Tinggi (IT);
- d) Program Pembangunan Usahawan Muda kerjasama Universiti Perguruan Sultan Idris (UPSI) dan KPM;
- e) Program Rehlah Ilmu: Pemerksaan Modal Insan Luar Bandar ke Arah Berkemahiran IR4.0 Berasaskan Sains – Mikrobiologi; dan
- f) Program Peduli Pendidikan Orang Asli Bateq Kampung Kuala Koh, Gua Musang.

Bagi tahun 2020, program berkenaan akan diteruskan dengan memberi penekanan kepada latihan profesional, peningkatan kemahiran, berkeperibadian, semangat patriotik, berinovatif dan berdaya saing serta memenuhi keperluan revolusi industri 4.0.

Di samping itu, KPM turut memberi tumpuan kepada Strategi Pengurusan Polariti WKB2030. Keutamaan adalah kepada kumpulan sasar yang merangkumi murid B40, miskin dan miskin tegar, rentan ekonomi, kurang upaya dan berkeperluan khas, orang asli, pribumi dan Bumiputera, kanak-kanak terpinggir, berisiko disiplin dan gagal dalam peperiksaan. Selaras dengan konsep kesaksamaan yang mendasari Wawasan Kemakmuran Bersama 2030, kumpulan sasar yang tertinggal

daripada arus pembangunan akan diberi keutamaan dalam mempertingkatkan tahap pendidikan dan sosioekonomi mereka agar tidak terus ketinggalan.

Pada masa ini, KPM sedang meneliti semula perancangan dan pelaksanaan program KPM, termasuk agenda pemerikasaan ekonomi Bumiputera dalam sektor pendidikan dengan mengambil kira aspek pemisahan KPM dan Kementerian Pengajian Tinggi serta kesan penularan wabak COVID-19. Ini adalah untuk memastikan pelaksanaan program yang dirangka dan dikenal pasti dapat memberi impak positif secara menyeluruh terutamanya kepada kumpulan sasar.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

**DARIPADA : Y.B. TUAN HASSAN BIN ABDUL KARIM
[PASIR GUDANG]**

TARIKH : 3 OGOS 2020 (ISNIN)

SOALAN

TUAN HASSAN BIN ABDUL KARIM [PASIR GUDANG] minta **MENTERI KEWANGAN** menyatakan menjelaskan apakah langkah-langkah pelaburan strategik yang telah diambil oleh Kumpulan Wang Simpanan Pekerja (KWSP) untuk memastikan setiap tahun KWSP boleh memberi dividen yang tinggi melebihi 6% kepada para pencarum yang terdiri daripada kaum pekerja.

JAWAPAN

Tuan Yang di-Pertua,

1. Untuk makluman Ahli Yang Berhormat, objektif pelaburan Kumpulan Wang Simpanan Pekerja (KWSP) sebagai sebuah dana persaraan jangka panjang adalah untuk melindungi dan menambah nilai simpanan ahli melalui pengisytiharan kadar dividen yang stabil dan mampan. Sasaran pelaburan KWSP adalah untuk mengisytihar dividen pada kadar tidak kurang 2.5% setahun, iaitu sasaran statutori bagi Simpanan Konvensional, manakala bagi menambah nilai simpanan ahli, KWSP mensasarkan kadar dividen purata tiga (3) tahun bergerak sebanyak 2% melebihi kadar inflasi.
2. Untuk memastikan KWSP boleh mencapai sasaran strategik tersebut, pelaburan KWSP mempunyai strategi pelaburan jangka panjang

berpanduan kepada Alokasi Aset Strategik (SAA) yang memperuntukkan aset secara optimal dengan mengambil kira had toleransi risiko KWSP sebagai sebuah dana simpanan persaraan. SAA ini dikaji semula setiap 3 tahun bagi memastikan jangkaan pulangan dan risiko adalah relevan dengan situasi dan keadaan pasaran modal semasa, perubahan polisi, regulatori, perakaunan dan bekalan aset di pasaran.

3. Pemberian dividen yang melebihi 6% kepada ahli KWSP adalah sesuatu yang mencabar di dalam persekitaran ekonomi dan pasaran modal yang semakin tidak menentu. Kelembapan ekonomi menyaksikan Rizab Persekutuan Amerika Syarikat memotong kadar faedah sebanyak tiga kali pada tahun 2019 dan dua kali pada bulan Mac 2020. Bank Negara Malaysia turut menurunkan Overnight Policy Rate (OPR) sebanyak lima kali sejak bulan Mei 2019 susulan pertumbuhan ekonomi negara yang perlahan serta persekitaran pasaran global yang mencabar. Ketidaktentuan pasaran ini dipengaruhi oleh faktor-faktor seperti perang dagangan AS-China yang berterusan, ketidakstabilan geopolitik di India, Hong Kong dan Timur Tengah yang berlarutan dan terkini, ancaman virus COVID-19 yang semakin meruncing di peringkat antarabangsa. Ketidaktentuan ini menyumbang kepada kemerosotan pasaran saham dunia termasuk Malaysia, yang mana indeks saham utama FBMKLCI telah merosot sebanyak 6.0% pada tahun 2019 dan terkini, telah jatuh sebanyak 5.5% setakat bulan Jun tahun 2020.

4. Kemerosotan pasaran saham domestik, serantau dan global serta persekitaran kadar faedah yang rendah bermakna pendapatan pelaburan KWSP daripada pelaburan Ekuiti dan Instrumen Berpendapatan Tetap akan terjejas dan seterusnya memberi cabaran kepada KWSP untuk memberi dividen yang lebih tinggi. Namun begitu, KWSP komited untuk terus berusaha memberi pulangan yang optimal kepada para pencarum.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

DARIPADA : TUAN LOKE SIEW FOOK [SEREMBAN]

TARIKH : 3 OGOS 2020 (ISNIN)

SOALAN

Minta **MENTERI PENGANGKUTAN** menyatakan bilangan pekerja sepenuh masa yang berkerja sebagai penghantar kurier atau makanan dengan motosikal persendirian melalui platform digital (Grab, Food Panda dan sebagainya) dan apakah dasar Kerajaan mengawal selia industri baru ini agar keselamatan dan hak golongan pekerja tersebut dilindungi dengan baik.

JAWAPAN

Yang Di-Pertua,

Untuk makluman Yang Berhormat, perkhidmatan kenderaan perkhidmatan awam dan kenderaan barangan menggunakan motosikal (bike-hailing) dikawal selia melalui kaedah/peraturan pelesenan di bawah Akta Pengangkutan Jalan 1987 [Akta 333], Akta Lembaga Pelesenan Kenderaan Perdagangan [Akta 334] dan Akta Pengangkutan Awam Darat 2010 [Akta 715].

Bagi perkhidmatan kenderaan barangan menggunakan motosikal, kawal selia masih belum dimulakan, mengambil kira bahawa pada masa keputusan ini dibuat, perkhidmatan tersebut (termasuk penghantaran barang makanan) telah pun beroperasi secara meluas di Malaysia. Antara perkhidmatan yang telah beroperasi termasuklah penghantaran barangan milik perniagaan sendiri seperti penjual putu mayam, Pos Malaysia, KFC dan Dominos Pizza serta penghantaran barangan milik pihak ketiga

seperti Food Panda, penjual ice-cream dan Grab Food. Bagi perkhidmatan untuk pihak ketiga, kebanyakan penyedia perkhidmatan telah turut menyediakan perkhidmatan menerusi aplikasi atas talian termasuk bagi membuat tempahan dan pembayaran.

Oleh yang demikian, Kementerian Pengangkutan pada masa ini tiada mempunyai data yang tepat ke atas jumlah sebenar bilangan pekerja sepenuh masa yang berkerja sebagai penghantar kurier atau makanan dengan motosikal persendirian melalui platform digital (Grab, Food Panda dan sebagainya). Namun berdasarkan anggaran kasar, dijangka sejumlah lebih 130 ribu individu terlibat dalam pekerjaan terbabit diseluruh negara.

Susulan isu pandemik Covid-19, MOT mendapati industri ini mempunyai potensi yang besar untuk berkembang dengan lebih meluas seterusnya membawa manfaat sosio-ekonomi kepada warga Malaysia, terutamanya melibatkan kumpulan B40. Industri perkhidmatan ini kelak akan menjadi satu norma selepas tempoh PKP dan pandemik Covid-19 berakhir.

Bagi tujuan penjelasan dan mengelakkan kekeliruan, MOT telah menamakan perkhidmatan kenderaan barangan menggunakan motosikal ini sebagai parcel-hailing atau p-hailing. Ianya bertujuan membezakan daripada perkhidmatan e-hailing (perkhidmatan kenderaan perkhidmatan awam menggunakan kenderaan motor yang muatan duduknya empat orang dan tidak lebih daripada sebelas orang (termasuk pemandu)) dan bike-hailing (perkhidmatan kenderaan perkhidmatan awam menggunakan motosikal).

Bagi memastikan perkhidmatan ini dijalankan secara adil, terkawal, selamat dan menjaga kebajikan pekerja dan pelanggan, Kementerian Pengangkutan akan menguatkuasakan peraturan bagi mengawal selia perkhidmatan terbabit. Pada masa ini, Kementerian Pengangkutan bersama agensi seperti APAD dan JPJ sedang dalam proses membangunkan rangka perundangan dan syarat-syarat perkhidmatan bagi mengawal selia perkhidmatan parcel-hailing atau p-hailing di Malaysia. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

DARIPADA : Y.B. DATUK ROZMAN BIN ISLI [LABUAN]

TARIKH : 3 OGOS 2020 (ISNIN)

SOALAN

DATUK ROZMAN BIN ISLI [LABUAN] minta **MENTERI KEWANGAN** menyatakan apakah langkah-langkah serius yang akan diambil oleh Kerajaan untuk membantu banyak keluarga yang terkesan teruk apabila ramai kehilangan pekerjaan akibat krisis ekonomi disebabkan oleh pandemik COVID-19 ini.

JAWAPAN

Tuan Yang Di-Pertua,

Pihak Kerajaan sememangnya amat prihatin dengan kesulitan yang dihadapi oleh isirumah yang telah kehilangan punca pendapatan akibat kegawatan ekonomi beikutan penularan wabak COVID-19. Oleh demikian, pihak Kerajaan telah melancarkan pakej Rangsangan Ekonomi Prihatin Rakyat (PRIHATIN) dan Pelan Jana Semula Ekonomi Negara (PENJANA) berjumlah RM295 bilion yang mempunyai pelbagai inisiatif bagi membantu mereka yang terkesan dari segi punca pendapatan akibat kegawatan yang melanda.

Dalam konteks ini, Kerajaan menerusi pakej-pakej rangsangan ekonomi yang diumumkan, telah mengambil pendekatan secara langsung menangani isu pendapatan terjejas, antaranya seperti berikut:

- I. Meringankan beban kewangan isirumah yang terjejas pendapatan melalui inisiatif seperti:
 - a. Bantuan tunai secara *one-off* dengan nilai diantara RM500 hingga RM1,600 melalui Bantuan Prihatin Nasional;
 - b. Bantuan tunai antara RM500 hingga RM600 secara *one-off* kepada pemandu teksi, pemandu *e-hailing*, penarik beca, pemandu pelancong, pemandu bas pelancong dan bas sekolah;
 - c. Pengeluaran KWSP Akaun 2 sebanyak RM500 sebulan terhad sehingga RM6,000 selama 12 bulan;
 - d. Moratorium 6 bulan pembayaran balik pinjaman daripada semua bank di Malaysia;
 - e. Sistem Insurans Pekerjaan (SIP) di bawah Perkeso bagi membantu pencarum SIP yang kehilangan pekerjaan; dan

- f. Bantuan khidmat nasihat kewangan daripada Agensi Kaunseling dan Pengurusan Kredit (AKPK), Bank Negara Malaysia.
- II. Meringankan beban kewangan isirumah yang berniaga kecil-kecilan yang terjejas pendapatan melalui insentif seperti:
- a. Bantuan tunai secara *one-off* dengan nilai RM3,000 melalui Geran Khas Prihatin; dan
 - b. Moratorium 6 bulan pembayaran balik pinjaman daripada semua bank di Malaysia.
- III. Merangsang permintaan pekerjaan di kalangan majikan dan meningkatkan peluang pekerjaan serta kebolehpekerjaan di kalangan pencari kerja tempatan melalui inisiatif berikut:
- a. Program Insentif Pengambilan Pekerja dan Program Latihan (PenjanaKerjaya);
 - b. Menaik taraf Portal Perkhidmatan Pekerjaan Negara bagi memperkukuh portal pekerjaan dan padanan kerja serta bekerjasama dengan portal pekerjaan swasta untuk padanan kerja; dan
 - c. Program kemahiran dan peningkatan kemahiran.

Kementerian Kewangan juga pada masa ini sedang mengkaji keberkesanan inisiatif-inisiatif yang telah diumumkan dan akan memperkenalkan langkah-langkah penambah baikan segera bagi memastikan golongan sasar yang terkesan dapat dibantu dengan lebih cekap dan berkesan. Unit Pelaksanaan dan Koordinasi Stimulus Ekonomi Antara Agensi Nasional (LAKSANA) telah ditubuhkan di bawah Kementerian Kewangan dan dipertanggungjawabkan untuk tujuan ini.

Sekian, terima kasih.

**SIDANG DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 3 OGOS 2020 (ISNIN)

SOALAN

minta **MENTERI KOMUNIKASI DAN MULTIMEDIA** menyatakan secara terperinci langkah yang akan diambil oleh pihak Kementerian untuk memastikan sebanyak mungkin PKS yang terlibat dengan inisiatif pendigitalan dalam Pelan Jana Semula Ekonomi Negara (PENJANA).

JAWAPAN

Tuan Yang diPertua,

1. Untuk makluman Ahli Yang Berhormat, di bawah Pelan Jana Semula Ekonomi Negara (PENJANA), *Malaysia Digital Economy Corporation* (MDEC) iaitu agensi di bawah Kementerian Komunikasi dan Multimedia Malaysia (KKMM) telah diberi mandat untuk melaksanakan beberapa inisiatif bertujuan menggalakkan penggunaan platform e-dagang serta teknologi digital dalam operasi perniagaan khususnya oleh Perusahaan Kecil dan Sederhana (PKS). Buat masa ini, pelaksanaan inisiatif ini masih diperingkat awal dan usaha sedang dilaksanakan bagi memastikan inisiatif-inisiatif ini memberi impak kepada sebanyak mungkin golongan PKS. Berikut adalah inisiatif PENJANA di bawah MDEC:

- a) Kempen **eDagang** untuk Usahawan Mikro dan PKS yang bertujuan untuk menggalakkan usahawan mikro dan PKS menggunakan platform dan aplikasi e-dagang untuk meluaskan pasaran mereka. Inisiatif ini dijangka akan memanfaatkan lebih 145,000 usahawan mikro dan PKS tempatan untuk mendapat bantuan dalam bentuk latihan *on-boarding* di platform e-dagang dan subsidi penjualan dan khidmat sokongan jualan. Dalam melaksanakan inisiatif ini, MDEC akan memanfaatkan maklumat PKS daripada program sedia ada seperti eUsahawan, Go-ecommerce, dan PeDAS. MDEC juga akan bekerjasama dengan Kementerian-Kementerian dan agensi-agensi pembangunan usahawan lain serta rakan-rakan e-dagang bagi memastikan golongan sasaran ini mendapat manfaat daripada program ini.
- b) **Kempen *Shop Malaysia Online*** yang merupakan kempen jualan e-dagang untuk menggalakkan pembelian dalam talian melalui pemberian baucar, diskaun dan rebat. Inisiatif ini menumpukan usaha menggalakkan dan meningkatkan jualan dalam talian untuk produk dan barangan PKS tempatan. Di samping itu, inisiatif ini turut bertujuan untuk menarik lebih banyak PKS tempatan menggunakan platform e-dagang dan menggalakkan eksport produk tempatan melalui platform e-dagang antarabangsa. Pelaksanaan inisiatif ini juga akan melibatkan kerjasama dari pelbagai Kementerian, agensi, rakan industri dan platform e-dagang tempatan dan antarabangsa.
- c) Geran Automasi Pintar atau *Smart Automation Grant* (SAG) yang merupakan bantuan kewangan dan bentuk geran padanan untuk syarikat-syarikat perkhidmatan mengautomasikan proses dan operasi perniagaan mereka dengan penggunaan teknologi digital. Inisiatif ini bertujuan untuk menggalakkan syarikat tempatan memanfaatkan teknologi digital untuk meningkatkan produktiviti serta mengurangkan kos operasi dan kebergantungan kepada proses manual. Mekanisme pelaksanaan Geran ini juga melibatkan kerjasama institusi kewangan dan rakan industri seperti syarikat telekomunikasi dan pakar industri.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

**DARIPADA : Y.B. DATO' SERI DR. SHAHIDAN BIN KASSIM
[ARAU]**

TARIKH : 3 OGOS 2020 (ISNIN)

SOALAN

DATO' SERI DR. SHAHIDAN BIN KASSIM [ARAU] minta **MENTERI KEWANGAN** menyatakan apakah pihak Kerajaan berhasrat untuk membuka kembali pendaftaran Geran Khas Prihatin (GKP) bagi memberi peluang kedua kepada peniaga yang tercicir dari menerima bantuan ini.

JAWAPAN

Tuan Yang di-Pertua,

Rayuan GKP telah dibuka semula pada 3 Jun sehingga 15 Jun 2020 bagi memberi peluang kedua kepada peniaga yang tercicir daripada menerima bantuan ini. **Seramai 22,196 telah diluluskan.**

Sekian, terima kasih.

**SIDANG DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN GOBIND SINGH DEO [PUCHONG]

TARIKH : 3 OGOS 2020 (ISNIN)

SOALAN

minta **PERDANA MENTERI** menyatakan apakah tindakan dan rancangan Kerajaan untuk membantu perniagaan kecil dan sederhana untuk menggunakan teknologi digital untuk menjayakan perniagaan mereka. Senaraikan bantuan kewangan atau sampingan yang telah pun disediakan oleh Kerajaan untuk menjayakan inisiatif-inisiatif ini.

JAWAPAN

Tuan Yang di-Pertua,

1. Kementerian Komunikasi dan Multimedia (KKMM) melalui Malaysia *Digital Economy Corporation* (MDEC) telah melaksanakan pelbagai inisiatif dan usaha bagi menggalakkan penggunaan teknologi digital dan platform e-dagang di kalangan PKS dan usahawan mikro tempatan. Antara program yang dilaksanakan termasuk:

- a. Program eUsahawan yang menyediakan pengetahuan dan ilmu keusahawanan digital kepada usahawan mikro, desa dan belia untuk menjana pendapatan, menjalankan pemasaran produk dan meningkatkan penjualan. Program ini merupakan program pembelajaran dalam talian secara interaktif dan mudah diakses menerusi laman web www.go-ecommerce.my yang telah memberi

alternatif kepada peserta yang tidak mempunyai akses, masa atau kekangan kewangan untuk hadir kursus.

b. Perkhidmatan eDagang Setempat (**PeDAS**) yang menyediakan perkhidmatan khidmat nasihat dan bantuan sokongan kepada usahawan luar bandar memasarkan produk mereka di platform e-dagang. Kemudahan PeDAS tersedia di Pusat Internet Desa (PID) di bawah KKMM dengan kerjasama MDEC.

c. *Go-eCommerce* merupakan pusat sumber dalam talian yang mempunyai pelbagai rujukan dan panduan lengkap untuk membantu PKS dan usahawan mikro untuk menyertai dan menggunakan aplikasi e-dagang.

2. Zon Perdagangan Bebas Digital (DFTZ) juga merupakan salah satu inisiatif e-dagang rentas sempadan. Fokus diberikan untuk menggalakkan eksport di kalangan PKS menerusi pelbagai ekosistem yang tersedia di platform e-dagang. Sehingga akhir tahun 2019, DFTZ telah membantu lebih 13,000 PKS tempatan mendapatkan akses ke pasaran e-dagang serantau dan global.

3. Di bawah Pelan Jana Semula Ekonomi Negara (PENJANA), MDEC juga melaksanakan inisiatif seperti berikut yang bertujuan menggalakkan penggunaan platform e-dagang serta teknologi digital dalam operasi perniagaan khususnya oleh Perusahaan Kecil dan Sederhana (PKS):

a. Kempen eDagang untuk Usahawan Mikro dan PKS yang bertujuan untuk menggalakkan usahawan mikro dan PKS menggunakan platform dan aplikasi e-dagang untuk meluaskan pasaran mereka. Inisiatif ini dijangka akan memanfaatkan lebih 145,000 usahawan mikro dan PKS tempatan untuk mendapat bantuan dalam bentuk latihan *on-boarding* di platform e-dagang dan subsidi penjualan serta khidmat sokongan jualan. Dalam melaksanakan inisiatif ini, MDEC akan memanfaatkan maklumat PKS daripada program sedia ada seperti eUsahawan, *Go-ecommerce*, dan PeDAS.

MDEC juga akan bekerjasama dengan pelbagai Kementerian dan agensi pembangunan usahawan lain serta rakan-rakan e-dagang bagi memastikan golongan sasaran ini mendapat manfaat daripada program ini.

b. Kempen *Shop Malaysia Online* yang merupakan kempen jualan e-dagang untuk menggalakkan pembelian dalam talian melalui pemberian baucar, diskaun dan rebat. Inisiatif ini menumpukan usaha menggalakkan dan meningkatkan jualan dalam talian untuk produk dan barangan PKS tempatan. Di samping itu, inisiatif ini turut bertujuan untuk menarik lebih banyak PKS tempatan menggunakan platform e-dagang dan menggalakkan eksport produk tempatan melalui platform e-dagang antarabangsa. Pelaksanaan inisiatif ini juga akan melibatkan kerjasama dari pelbagai Kementerian, agensi, rakan industri dan platform e-dagang tempatan dan antarabangsa.

c. Geran Automasi Pintar atau *Smart Automation Grant* (SAG) yang merupakan bantuan kewangan dan bentuk geran padanan untuk syarikat-syarikat perkhidmatan mengautomasikan proses dan operasi perniagaan mereka dengan penggunaan teknologi digital. Inisiatif ini bertujuan untuk menggalakkan syarikat tempatan memanfaatkan teknologi digital untuk meningkatkan produktiviti serta mengurangkan kos operasi dan kebergantungan kepada proses manual. Mekanisme pelaksanaan Geran ini juga melibatkan kerjasama institusi kewangan dan rakan industri seperti syarikat telekomunikasi dan pakar industri.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DATO' NGEH KOO HAM [BERUAS]

TARIKH : 21 JULAI 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan bagaimana Kerajaan menyelesaikan kes-kes nelayan yang ditangkap oleh Jabatan Perikanan dan kes-kes yang ditangkap oleh Agensi Penguat Kuasa Maritim Malaysia supaya nelayan-nelayan tersebut mendapat layanan yang sama di bawah undang-undang sungguhpun mereka ditangkap oleh agensi Kerajaan yang berlainan.

.

JAWAPAN: YB DATUK SERI DR RONALD KIANDEE,
MENTERI PERTANIAN DAN INDUSTRI MAKANAN

Yang di-Pertua,

1. Akta Perikanan 1985 memperuntukkan kuasa kepada Ketua Pengarah Perikanan untuk mengambil tindakan seperti mengenakan kompaun, menyita peralatan, menggantung atau membatalkan lesen vesel bagi mana-mana kesalahan yang dilakukan di bawah akta ini.

2. Agensi Penguatkuasaan Maritim Malaysia (APMM) juga menjalankan operasi penguatkuasaan berdasarkan Akta Perikanan [Akta 317] selaras dengan Akta APMM 2004 [Akta 633] di mana APMM mempunyai kuasa untuk menguatkuasakan undang-undang di bawah mana-mana undang-undang Persekutuan di dalam Zon Maritim Malaysia.

3. Pada tahun 2018, sebanyak 1,228 kes tangkapan yang direkodkan DOF, antaranya kesalahan seperti pencerobohan zon tangkapan, menangkap ikan tanpa lesen, penggunaan peralatan perikanan yang tidak dibenarkan dan penggunaan kru warganegara asing tanpa permit. Manakala sebanyak 475 kes tangkapan yang dilaporkan oleh APMM pada tahun yang sama.

4. Segala peruntukan kesalahan dan hukuman telah dinyatakan dengan jelas merujuk kepada kedua-dua Akta berkenaan untuk dijadikan sebagai asas pertimbangan bagi tindakan yang akan diputuskan oleh pihak Timbalan Pendakwa Raya kepada nelayan yang melakukan kesalahan. Akta Perikanan 1985 juga memperuntukkan kuasa untuk pesalah membuat rayuan bagi meringankan hukuman yang telah dijatuhkan oleh mahkamah.

5. Sehubungan dengan itu, berdasarkan peruntukan undang-undang sedia ada, tidak timbul isu perbezaan layanan walaupun mereka ditangkap oleh agensi Kerajaan yang berlainan.

Sekian, terima kasih.

**SIDANG DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN KASTHURIRAANI A/P PATTO
[BATU KAWAN]**

TARIKH : 27 JULAI 2020 (ISNIN)

SOALAN

PUAN KASTHURIRAANI A/P PATTO [BATU KAWAN] minta **MENTERI KOMUNIKASI DAN MULTIMEDIA** menyatakan bilangan laporan polis dan bilangan laporan kepada Suruhanjaya Multimedia dan Komunikasi yang telah dibuat setakat ini mengikut pecahan berita palsu, berita fitnah, gambar/perkongsian yang berbaur lucah/ seksual/ rasis, “hate speech” / “cyber bullying” dan apakah status laporan tersebut dari segi dakwaan, sabitan bersalah dan tidak bersalah.

JAWAPAN

Tuan Yang Dipertua,

1. Untuk makluman Ahli Yang Berhormat, antara Januari sehingga Jun 2020, secara keseluruhannya pihak Suruhanjaya Komunikasi dan Multimedia Malaysia (SKMM) telah menerima sejumlah **11,235** aduan berkaitan pelbagai kesalahan yang dilakukan di alam siber terutamanya melibatkan kandungan media baharu, termasuklah tetapi tidak terhad kepada penggodaman, perjudian, penipuan, promosi pelacuran, pelanggaran hakcipta, pendedahan dokumen rasmi, gangguan, buli siber, penyebaran kandungan berbentuk pornografi, penyebaran video/gambar peribadi, berita/kandungan palsu, laman web/akaun palsu (penyamaran), kandungan berunsur kebencian terhadap agama, kaum, Institusi Diraja, kandungan berunsur extremismisme, penyelewengan agama dan sebagainya.

2. Walau bagaimanapun jumlah aduan yang diterima dalam tempoh tersebut tidak hanya termaktub di bawah bidang kuasa pihak SKMM semata-mata. Ia juga turut tertakluk di bawah bidang kuasa agensi-agensi penguatkuasaan undang-undang lain seperti Polis Di Raja Malaysia (PDRM), Kementerian Kesihatan Malaysia (KKM), Kementerian Perdagangan Dalam Negeri Koperasi dan Hal Ehwal Pengguna (KPDNHEP) dan sebagainya, mengikut bidang kuasa masing-masing.

3. Dalam tempoh yang sama, sejumlah **143** kes telah disiasat di bawah Seksyen 233, Akta Komunikasi dan Multimedia 1998 (Akta 588) oleh pihak SKMM berhubung penyalahgunaan media sosial, dan **7** daripadanya telah dihadapkan ke mahkamah.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

**DARIPADA : Y.B. DATO' JOHARI BIN ABDUL
[SUNGAI PETANI]**

TARIKH : 3 OGOS 2020 (ISNIN)

SOALAN

DATO' JOHARI BIN ABDUL [SUNGAI PETANI] minta **MENTERI KEWANGAN** menyatakan :-

- (a) apakah rasional melantik Ahli-ahli Parlimen Kerajaan untuk mengepalai Syarikat Berkaitan Kerajaan (GLC) ; dan
- (b) senaraikan nama-nama mereka yang dilantik, di mana dan berapa elaun bulanan yang mereka terima.

JAWAPAN

Tuan Yang Dipertua,

Untuk makluman Yang Berhormat, Pengerusi dalam syarikat-syarikat Menteri Kewangan (Diperbadankan) [MKD] adalah dilantik berdasarkan kepada kemampuan serta kepakaran masing-masing dan mengambil kira keperluan syarikat itu sendiri bagi membolehkan Lembaga Pengarah syarikat berkenaan beroperasi pada tahap yang optimum. Pelantikan Pengerusi syarikat MKD disuaipadankan berdasarkan keperluan setiap syarikat MKD dengan mengambil kira latar belakang dan kebolehan seseorang individu daripada pelbagai sudut bagi menganggotai Lembaga Pengarah syarikat MKD.

Justeru itu, Ahli Parlimen yang berkeelayakan atau memenuhi kriteria *fit and proper* sahaja yang dilantik untuk menerajui Lembaga Pengarah syarikat-syarikat MKD. Ini adalah salah satu cara untuk meningkatkan keupayaan barisan kepimpinan ALP syarikat MKD dengan memperluaskan serta mempelbagaikan lagi komposisi ahli-ahlinya daripada segi kemampuan, kepakaran dan pengalaman. Pengalaman sama ada dalam bidang operasi, teknikal, profesional atau pendedahan spesifik kepada sektor berkaitan adalah penting bagi memastikan *the right person with the right skills* (dengan izin) dipilih bagi memantapkan struktur Lembaga Pengarah syarikat. Di samping itu, penekanan juga akan diberikan kepada nilai personaliti individu dengan mengambil kira aspek-aspek integriti dan kebertanggungjawaban dalam melaksanakan amanah yang diberikan.

Pelantikan Ahli Parlimen adalah sebagai Pengerusi Bukan Eksekutif yang mana akan membataskan kuasa di antara Lembaga Pengarah dan Pengurusan selaras dengan MCCG 2017 dan sebagai mekanisma semak dan imbang (*check and balance*) agar selari dengan dasar dan aspirasi Kerajaan. Lantikan politik dijangka dapat mengimbangi kehendak korporat yang lebih cenderung berorientasikan keuntungan di samping memenuhi ekspektasi rakyat.

Untuk makluman Yang Berhormat juga, sehingga Julai 2020, seramai 13 orang Ahli Parlimen telah dilantik sebagai Pengerusi syarikat-syarikat Menteri Kewangan (Diperbadankan) [MKD]. Senarai penuh Ahli Parlimen tersebut adalah seperti berikut:

BIL.	NAMA	BIL.	JAWATAN DALAM LEMBAGA	SYARIKAT
1.	YAB Tan Sri Muhyiddin bin Mohd Yassin	1.	Pengerusi Bukan Eksekutif	Khazanah Nasional Berhad
		2.	Pengerusi Bukan Eksekutif	Yayasan Pelaburan Bumiputera
2.	YB ACP (B) Tuan Ramli bin Dato' Mohd Nor	3.	Pengerusi Bukan Eksekutif	Amanah Raya Berhad
3.	YB Dato' Hasbullah bin Osman	4.	Pengerusi Bukan Eksekutif	Syarikat Perumahan Negara Berhad
4.	YB Dato' Jalaluddin bin Alias	5.	Pengerusi Bukan Eksekutif	UDA Holdings Berhad
5.	YB Dato' Seri Diraja Mahdzir bin Khalid	6.	Pengerusi Bukan Eksekutif	Tenaga Nasional Berhad
6.	YB Dato' Sri Hassan bin Arifin	7.	Pengerusi Bukan Eksekutif	Pengurusan Aset Air Berhad
7.	YB Dato' Sri Hj Rohani binti Abdul Karim	8.	Pengerusi Bukan Eksekutif	Padiberas Nasional Berhad
8.	YB Dato Sri Tajuddin bin Abdul Rahman	9.	Pengerusi Bukan Eksekutif	Prasarana Malaysia Berhad

9.	YB Datuk Musa bin Sheikh Fadzir	10.	Pengerusi Bukan Eksekutif	JKP Sdn Bhd
10.	YB Datuk Zakaria bin Mohd Edris @ Tubau	11.	Pengerusi Bukan Eksekutif	Perbadanan Nasional Berhad
11.	YB Tuan Haji Ahmad Johnie bin Haji Zawawi	12.	Pengerusi Bukan Eksekutif	Indah Water Konsortium Sdn Bhd
12.	YB Ustaz Sabri bin Hj Azit	13.	Pengerusi Bukan Eksekutif	Institut Terjemahan & Buku Malaysia Berhad
13.	YB Tan Sri Noh bin Hj Omar	14.	Pengerusi Bukan Eksekutif	Perbadanan Usahawan Nasional Berhad

Secara prinsipnya, kadar elaun dan insentif yang layak bagi Pengerusi syarikat MKD berbeza-beza mengikut kemampuan kewangan syarikat masing-masing. Jumlah imbuhan dan ganjaran yang dibayar kepada Pengerusi boleh diperolehi daripada penyata kewangan beraudit syarikat yang dikemukakan kepada Suruhanjaya Syarikat Malaysia (SSM).

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

DARIPADA : Y.B. TUAN LIM KIT SIANG [ISKANDAR PUTERI]

TARIKH : 3 OGOS 2020 (ISNIN)

SOALAN

TUAN LIM KIT SIANG [ISKANDAR PUTERI] minta **MENTERI KEWANGAN** menyatakan senarai GLC dan GLIC di mana lantikan politik telah dibuat sejak 2 Mac 2020 dan bagaimana lantikan ini akan membantu keberkesanan dan profesionalisme badan-badan ini.

JAWAPAN

Tuan Yang Dipertua,

Untuk makluman Yang Berhormat, sehingga Julai 2020, lantikan politik telah dibuat dalam Lembaga Pengarah bagi 17 buah syarikat Menteri Kewangan (Diperbadankan) [MKD] seperti senarai berikut:

BIL.	SYARIKAT MKD
1.	Amanah Raya Berhad
2.	FELCRA Berhad
3.	Indah Water Konsortium Sdn Bhd
4.	Institut Terjemahan & Buku Malaysia Berhad

BIL.	SYARIKAT MKD
5.	JKP Sdn Bhd
6.	Khazanah Nasional Berhad
7.	Padiberas Nasional Berhad
8.	Pengurusan Aset Air Berhad
9.	Perbadanan Nasional Berhad
10.	Perbadanan Usahawan Nasional Berhad
11.	Prasarana Malaysia Berhad
12.	Rangkaian Hotel Seri Malaysia Sdn Bhd
13.	Syarikat Perumahan Negara Berhad
14.	Tenaga Nasional Berhad
15.	UDA Holdings Berhad
16.	Yayasan Amanah Hartanah Bumiputera
17.	Yayasan Pelaburan Bumiputera

Ahli politik adalah dilantik berdasarkan kepada kemampuan serta kepakaran masing-masing dan mengambil kira keperluan syarikat itu sendiri bagi membolehkan Lembaga Pengarah syarikat berkenaan beroperasi pada tahap yang optimum. Pelantikan Ahli Lembaga Pengarah (ALP) syarikat MKD disuaipadankan berdasarkan keperluan setiap syarikat MKD dengan mengambil kira latar belakang dan kebolehan seseorang individu daripada pelbagai sudut bagi menganggotai Lembaga Pengarah syarikat MKD.

Justeru itu, ahli politik yang berkelayakan atau memenuhi kriteria *fit and proper* sahaja yang dilantik untuk menganggotai Lembaga Pengarah syarikat-syarikat MKD. Ini adalah salah satu cara untuk meningkatkan keupayaan barisan kepimpinan ALP syarikat MKD dengan memperluaskan serta mempelbagaikan lagi komposisi ahli-ahlinya daripada segi kemampuan, kepakaran dan pengalaman.

Pengalaman sama ada dalam bidang operasi, teknikal, profesional atau pendedahan spesifik kepada sektor berkaitan adalah penting bagi memastikan *the right person with the right skills* (dengan izin) dipilih bagi memantapkan struktur Lembaga Pengarah syarikat. Disamping itu, penekanan juga akan diberikan kepada nilai personaliti individu dengan mengambil kira aspek-aspek integriti dan kebertanggungjawaban dalam melaksanakan amanah yang diberikan.

Sekian, terima kasih.